

四庫全書

史部

# 欽定四庫全書

史部

姑蘇志卷五十五

六五

詳校官編修<sub>臣</sub>曹振鏞

檢討<sub>臣</sub>德生覆勘

總校官知縣<sub>臣</sub>楊懋珩

校對官中書<sub>臣</sub>李 榮

謄錄監生<sub>臣</sub>沈安邦

欽定四庫全書

姑蘇志卷五十五

明 王鏊 撰

人物十五 卓行

被裘公吳人也延陵季子出遊見路有遺金當夏五月  
有被裘而薪者季子呼薪者曰取彼地金來薪者投  
鏹於地瞋目拂手而言曰何子居之高視之下儀貌  
之壯語言之野也吾五月被裘而薪豈取金者哉季  
子謝之請問姓字薪者曰子皮相之士也何足語姓

名遂去不顧

龍丘萇郡人王莽時隱居太始末徵不應更始時任延署為議曹祭酒互見官蹟條延傳

何敞少好道藝隱居重以大旱民物顛頓太守慶弘遣戶曹掾致謁奉印綬煩守無錫敞不受退歎而言曰郡界有災安能得懷道因跋涉之縣駐明星屋中蝗蝻消死敞即遁去後舉方正博士皆不就卒于家

陸著字文伯漢桓靈之間州府交辟不就唯娛栖遁臨



卒誠諸子弟云吾少未嘗官於世四十餘年以汝等  
必矜義勿苟仕濁世子孫奉遵遺訓遂三代不仕皆  
有盛名

陸續字智初吳縣人幼孤仕郡戶曹史時歲荒民饑太  
守尹興使續於都亭賦民饘粥續悉簡閱其名訊以  
名氏事畢興問所食幾何續因口說六百餘人皆分  
別姓字無有差謬興異之刺史行部見續辟為別駕  
從事以病去還為郡門下掾楚王英謀反陰疏天下

善士及楚事覺顯宗得其錄有尹興名乃徵興詣廷尉獄續與主簿梁宏功曹史駟勲及掾史五百餘人詣洛陽詔獄就考諸吏不堪痛楚死者大半唯續宏勲掠考肌肉消爛終無異辭續母遠至京師覘候消息獄事時急無緣與續相聞母但作饋食付門卒以進之續雖見考苦毒而詞色慷慨未嘗易容唯對食悲泣不能自勝使者怪而問其故續曰母來不得相見故泣耳使者大怒以為獄門吏卒通傳意氣召將

案之續曰因食餉羹識母所自調和故知來耳非人  
告也使者問何以知母所作乎續曰母截肉未嘗不  
方斷葱以寸為度是以知之使者問諸謁舍續母果  
來陰嘉之上書說行狀乃赦興等事還田里禁銅終  
身續以老病卒子稠字伯羸為廣陵太守姦吏斂手  
廣陵諺曰解理結煩我國陸君中子逢樂安太守少  
子褒有志操力行好學不慕榮名連徵不就

桓曄一名嚴

或作嚴

字文林龍亢人明帝時太常榮五世

孫仕郡功曹後舉孝廉有道方正茂才三公并辟皆不應初平中天下亂避地會稽遂浮海客交趾越人

化其節至閭里不爭訟為人所誣死于合浦獄

按東

觀記桓礪到吳郡揚州刺史劉繇振給穀食衣服所乏者悉不受後適會稽住止山陰故魯相鍾離意舍太守王朗納給糧食布帛牛羊一無所留臨去之際屋中尺寸之物悉疏付主人纖微不漏

孫晷字文度吳人也為兒童未嘗被訶怒少田於野時年饑穀貴有盜刈其稻者晷見而避之既去又自刈一擔送與之鄉人感愧及長恭孝清約學識有理義

辟命皆不就每獨處幽閣之中容止瞻望未嘗傾邪  
見人饑寒並周贍之父母起居嘗饌雖諸兄親饋而  
畧不離左右富春車道少動經江水父難於風波畧  
常從後親自入水扶持籃車所詣之處藩屏隱息不  
令主人知之時會稽虞喜隱居海隅有高世之風畧  
欽其德聘喜弟預女為妻喜嫁女棄華尚素時人號  
為梁鴻夫婦

張翰字季鷹大鴻臚儼之子也有清才美望博學善屬

文詞義新麗造次立成而縱任不拘時人號為江東  
步兵賀循赴命經吳閭門於船中彈琴翰初不相識  
乃就循言譚便大相歡悅問循知其入洛翰曰吾亦  
有事北京便同載即去而不告家人齊王冏辟為大  
司馬東曹掾冏時執權翰謂顧榮曰天下紛紛禍難  
未已夫有四海之名者求退良難吾本山林間人無  
望於時子善以明防前以智慮後秋風起乃思吳中  
菰菜蓴羹鱸魚膾曰人生貴得適志何能羈宦數千

里以要名爵乎遂命駕而歸著首丘賦文多不載俄而問敗人皆謂之見幾然以其輒去除吏名翰任心自適不求當世或謂之曰卿乃可縱適一時獨不為身後名耶答曰使我有身後名不如即時一杯酒時人貴其曠達性至孝遭母憂哀毀過禮年五十七卒其文筆數十篇行於世

顧協字正禮晉司空和六世孫也幼孤隨母養於外氏外從祖張永嘗携內外孫姪游虎丘山協年數歲永

撫之曰兒欲何戲協曰兒政欲枕石漱流永歎息曰  
顧氏興於此子及長好學外氏諸張多賢達有識鑒  
內弟率尤推重焉初為揚州議曹從事史兼太學博  
士舉秀才沈約覽其策而歎曰江左以來未有斯作  
遷安成王國左常侍兼廷尉正太尉臨川王聞其名  
召掌書記除安都令未至縣遭母憂刺史始興王厚  
資遣之送喪還於峽江遇風同旅皆漂溺唯協一舫  
觸石得泊焉咸謂精誠所致服闋出補西陽郡丞還



除北中郎行參軍復兼廷尉正久之出為廬陵郡丞  
未拜會西豐侯正德為吳郡除中軍領郡五官遷輕  
車湘東王參軍事兼記室與琅邪顏協名職俱同才  
學相亞府中稱為二協天監十五年救徐勉入華林  
撰徧畧勉舉協及何思澄劉杳王子雲鍾嶼等五人  
應選成書七百卷普通六年正德受詔北討引為府  
錄事參軍掌書記軍還會有詔譽士湘東表薦之曰  
臣府兼記室參軍吳郡顏協行稱鄉閭學兼文武服

膺道素雅量邃遠安貧守靜奉公抗直傍闕知己志不自營年方六十室無妻子臣欲言於官人申其屈滯協苦執真退立志難奪可謂東南之遺寶矣即召拜通直散騎侍郎兼中書通事舍人累遷步兵校尉守鴻臚卿員外散騎常侍卿舍人並如故自為近臣便繁機密每有制述敕前示協時輩榮之大同八年卒年七十三無衾以歛武帝悼惜之手詔曰顧協廉潔自居白首不衰久在省闈內外稱善奄然殞喪惻

怛之懷不能已已傍無近親彌足哀者大殮既畢即  
送其喪柩還鄉并營冢槨並皆資給悉使周辦可贈  
散騎常侍令便舉哀謚曰溫子協清介有志操初為  
廷尉正冬服單薄蔡法度欲解襦與之憚其清嚴不  
敢發口謂人曰我願解身上襦與顧郎恐顧郎難衣  
食者竟不敢在省十六載器服飲食不改於常自丁  
艱憂終身布衣蔬食少時將聘舅息未成婚而協母  
亡免喪後不復娶至六十餘此女猶未他適協義而

迎之晚雖判合卒無子嗣協博極羣書於文字及禽獸草木尤稱精詳撰異姓苑五卷瑣語十卷文集十

卷並行於世

南史云協為舍人同官者皆潤屋有門生始來事協知其廉潔不敢厚餉止送

錢二千協發怒杖二十因此事著絕於饋遺

何求字子有潛人宋宜都太守鑠之子也元嘉末為丈挽郎歷太子洗馬丹陽郡丞清退無嗜欲後為太子中舍人泰始中妻亡還吳葬舊墓除中書郎不拜仍住吳隱居波若寺足不踰戶人莫見其面明帝崩出

奔國哀除永嘉太守一夜乘小船逃歸吳隱武丘山  
齊永明四年拜太中大夫不就卒初鑠素有風疾無  
故害求母坐法死求兄弟以此無宦情弟點

點字子哲年十一居父母憂幾至減性及長感家禍欲  
絕昏宦卒不肯娶明目秀眉容貌方雅貞素通美不  
以門戶自矜博通羣書善談論家本素族親姻多貴  
仕點雖不入城府而教遊人間不簪不帶以人地並  
高無所與屈或乘柴車躡草屨恣心所適致醉而歸

故世論以點為孝隱士弟肩為小隱士士大夫多慕從之時又通號曰游俠處士兄求卒點菜食不飲酒訖十三年太始末徵為太子洗馬齊初累徵中書侍郎太子中庶子並不就與陳郡謝淪吳國張融會稽孔德璋為莫逆友點少時嘗患渴利積歲不愈後在吳中石佛寺建講晝寢夢一道人形貌非常授丸一劑夢中服之自此而差時人以為淳德所感梁武帝與點兄弟有舊天監初以侍中召點不就二年卒

脩字子季出繼叔父曠故更字脩叔年八歲居憂毀若  
成人晚乃折節好學仕齊建安太守政有恩信後以  
國子祭酒侍中及鬱林王嗣位脩為后族為中書令  
拜表解職東之會稽居若邪山雲門寺初脩二兄求  
點並棲遁求先卒脩又隱世謂點為大山脩為小山  
亦曰東山號何氏三高永元中徵為太常太子詹事  
梁武帝詔為特進光祿大夫並不就敕給白衣尚書  
祿固辭又遷秦望山起學舍初何氏過江自晉司空

充竝葬吳西山肩家世年皆不永唯祖尚之至七十  
二肩年登祖壽乃移還吳作別山詩一首言甚悽愴  
至吳居武丘山西寺講經論學僧復從之東境守宰  
經途者莫不畢至肩常禁殺有虞人逐鹿徑來趨肩  
伏而不動又有異鳥如鶴紅色集講堂馴狎如家鳥  
大通三年卒年八十六

陶峴者晉徵士淵明後也開元中居崑山富有田業擇  
不欺者悉付以家事峴徧游江湖往往數年不歸見



其子孫成人初不辯其名字峴文學可以經濟自謂  
踈脫不謀宦達生知八音撰樂錄八章以定其得失  
自制三舟備極堅巧一以自載一置賓客一貯飲饌  
客有孟彥深孟雲卿焦遂各置僕妾共載峴有女樂  
一部奏清商曲逢佳山水必窮其勝名聞朝廷經過  
郡邑靡不招延峴不肯來自謂麋鹿野人非王公上  
客亦有不召而自詣者吳越之士號為水僊素慕謝  
康樂之為人云終當樂死山水浪迹三十餘年及游

襄陽西塞歸老於吳

殷懌字易從曲阿人少負志氣博學善屬文弱冠游太學籍甚公卿間天寶末知天下將亂乃趣裝東歸侍母居吳郡吳中士大夫與之遊者鄉黨以為榮採訪使李希言辟為從事奏保懌崑山尉不就子侑

陸龜蒙字魯望元方七世孫父賓虞以文歷侍御史龜蒙少高放通六經大義尤明春秋舉進士一不中往從湖州刺史張搏遊歷湖蘇二州辟以自佐嘗至饒

州三日無所詣刺史蔡京率官屬就見之龜蒙不樂  
拂衣去居松江甫里多所論撰雖幽憂疾痛貲無十  
日計不少輟也文成竄藁篋中或厯年不省為好事  
者盜去得書熟誦乃錄讐比勤勤朱黃不去手所藏  
雖少其精皆可傳借人書篇帙壞舛必為輯褫刊正  
樂聞人學講論不倦有田數十畝屋二十楹田苦下  
雨潦則與江通故常苦饑身畚市採刺無休時或譏  
其勞答曰堯舜黜瘠禹胼胝彼聖人也吾一褐衣敢

不勤乎嗜茶置園顧渚山下歲取租茶自判品第張  
又新為水說七種其二惠山泉三虎丘井六松江人  
助其好者雖百里為致之初病酒再暮乃已其後客  
至置潔壺栢不復飲不喜與流俗交造門不肯見不  
乘馬并舟設蓬席齋束書茶竈筆牀釣具往來時謂  
江湖散人或號天隨子甫里先生自比涪翁漁父江  
上丈人後以高士召不至李蔚盧攜素與善及當國  
召拜左拾遺詔方下龜蒙卒光化中韋莊表龜蒙及

孟郊等十人皆贈右補闕陸氏在姑蘇其門有巨石  
遠祖績為鬱林太守罷歸無裝舟輕不可越海取石  
為重人稱其廉號鬱林石世保其居云

蔣貽恭吳人流落入蜀性耿直有逸才每一吟詠率多  
諷刺時蜀主季年臣僚多尚權勢侈敖無節因為詩  
以諷之蜀主知其不避曰敢言之士也特授雅州名  
山令又善隸篆賜銀緋

松江漁翁者不知何許人恒擢舟遊長橋往來波上意

氣自得醉則扣舷而歌紹聖中閩人潘裕自京師調  
官回道吳江遇而異焉起揖之曰予視先生氣貌固  
非漁釣之流願勾緒言以發蒙陋翁曰吾厭喧囂處  
閒曠遯迹於茲三十年矣幼喜誦經史百家之言後  
觀釋氏書今皆棄去唯飽食以嬉尚何所事裕曰先  
生澡身浴德如此今聖明在上盍出而仕乎翁笑曰  
君子之道或出或處吾雖不能棲隱巖穴追園綺之  
蹤竊慕老氏曲全之義且棄軒冕如糞土耳與子出

處異趣子勉之裕曰幸聞志者忘形養心者忘道致  
道者忘心心形俱忘其視先生之高義敢問舍所翁  
曰吾姓名且不欲人知况居室邪飲畢鼓枻而去

鍾璇字振遠一字叔齊常熟人六歲而孤育于繼祖龍  
圖學士林適家適家多書因得縱觀與其孫璟瓌琢  
同肄業課率先成後璟三兄弟竝登第璇遂棄舉子  
業取所藏盡閱之侍官台州嘗遊巖谷間遇異人衣  
僧服持列禦冠書揖而與坐磐石指一泓定水曰此

水滔滔乃皇極大中之道語久別去自是有悟益不  
溺於名利放浪漁釣間築室梅里所居多蒔香草閉  
戶二十年家貧殊不戚戚有求者解衣分粟無靳色  
唐琢自留守歸寓梅里與為忘年交提舉徐誼知府  
沈揆皆造其廬以奇人目之范成大等薦于朝不報  
卒年五十二有藥園藁山中錄續孔白帖秦漢以來  
鍾鼎奇字藏於家

鄭思肖字憶翁號所南連江人祖咸卒於枝江主簿父



震字叔起淳祐道學君子為安定和靖二書院山長  
有菊山詩集景定壬戌卒於吳葬長洲縣甌山思肖  
太學上舍應博學宏詞科侍父來吳寓條坊巷元兵  
南下扣關上太皇太后幼主疏辭切直忤當路不報  
初名某宋亡乃改今名思肖即思趙憶翁與所南皆  
寓意也素不娶孑然一身念念不忘君形言於詩文  
中如過徐子方書塾云不知今日月但夢宋山川題  
鄭子封寓舍云此世但除君父外不曾別受一人恩

寒菊云寧可枝頭抱香死不曾吹落北風中贈人云  
天下皆變吾觀其不變惟其不變廼所以變其變者  
物也不變者道也又云古人重立身今人重養身立  
身者蓋超乎千古之上與天地周流於不知不識之  
天也養身者惜一粟以活微命後於萬物死於萬變  
者也何足道哉遇歲時伏臘輒野哭南向拜人莫  
測識焉聞北語必掩耳亟走人亦知其孤僻不以爲  
異也坐臥不北向扁其室曰本穴世界以本字之十

置下文則大宋也精墨蘭自更祚後為蘭不畫土根  
無所憑藉或問其故則云地為他人奪去汝不知邪  
不欲與雖迫以勢權不可得也天目本中峯禪林之  
白眉聞思肖名欲見未果偶會於孝子梅應發家一  
見各默不語坐久之本忽云所南何不說法思肖曰  
兩眼對兩眼無法可說及別去本又云博學老子思  
肖即曰世法和尚趙孟頫才名重當世思肖惡其宗  
室而受元聘遂與之絕孟頫數往俟之終不得見嘆

息而去無何化其所居得錢則週人之急田亦捨諸  
刹惟餘數畝為衣食資仍謂佃客曰我死則汝主之  
益不以家為矣自是無定跡吳之名山禪室道宮無  
不遍歷多寓城之萬壽覺報二刹疾亟時囑其友唐  
東嶼曰思肖死矣煩為書一位牌當云大宋不忠不  
孝鄭思肖語訖而絕年七十八蓋其意謂不能死國  
與無後也自贊其像曰不忠可誅不孝可斬可懸此  
頭於洪洪荒荒之表以為不忠不孝之榜樣宋社既

墟適意緇黃自稱三外野人嘗著大無工十空經一卷空字去工而加十宋字也寓為大宋經造語奇澁如庾詞莫可曉自題其後云臣思肖嘔三斗血方能書此後當有巨眼識之又著釋氏施食心法一卷太極祭煉一卷謬餘集一卷文集一卷自叙一百二十

圖詩一卷

思肖母樓氏宋侍從鑰之族妹為比丘尼名普兩受業於飲馬橋南寶林尼寺

張介福字子祺覃懷人從姑氏來吳少慕鄉先生許衡遂軒軒以禮自持為學鞭辟近裏不事表襮雖步周

旋必蹈規矩以不及奉親未嘗食士祿張士誠入吳  
兵掠其家端坐不動兵脇之令其導諸富家不從乃  
以刀斫其面流血仆地復戴冠危坐而顏色自若兵  
捨之而去家素貧冬不具衣襦或遺以袂絮固辭之  
雖小物亦不受後因親墓在城西恐盜發之遂廬於  
墓側及臥病至死神爽弗昧語其友曰吾學古人一  
無所成死有餘憾矣

人物十六 隱逸

顧初者郡人也嘗有牛暴其禾初見牽牛陰涼木下刈芻飼之牛主愧服不敢暴焉

顧黯字長孺郡人有隱操齊永明元年徵為散騎侍郎同郡鹽官顧歡為太學博士俱不就

徐修矩吳縣人唐恩王府記室叅軍奕世才賢居家介潔守書萬卷優游自適有潮田五萬步草屋十數間不復出仕皮日休嘗就借書讀之其時有任晦亦同縣人日休與陸龜蒙作二游詩

史德義崑山人唐咸寧初隱居武丘山以琴書自適或騎牛帶瓢出入郊郭東市號為逸人高宗聞其名召赴洛陽尋稱疾歸公卿皆賦詩餞別德義亦以詩留贈其文甚美天授初江南道宣勞使周興表薦則天徵赴都詔曰蘇州隱士史德義志尚虛玄素履真確謙冲彰於里閭孝友表於閨庭固辭徵辟長往巖陵之瀨多謝簪裾高蹈愚公之谷風操可知啓沃攸佇特宜優獎委以諫曹授諫議大夫興死放歸丘壑素



譽頓哀

新唐書云以周興薦擢朝散大夫

陸諤自右拾遺除司勳郎中棄官隱吳中詔召之既在道歐陽柎遺書誚其出處之遽諤遂還柎詹從子也名亦高

胡稷言字正思兵部侍郎則之從子少學古文於宋祁後獻時議於范仲淹復授經於胡瑗以特奏補官調晉陵尉歷鄞縣簿山陰丞自以不能究其所施遂乞致仕陞朝後仍賜緋衣銀魚既告老即所居臨頓里

陸魯望遺趾築圃鑿池追陶靖節之風作五柳堂清  
修寡欲延納後進日晡後不復飲食客至蕭然具湯  
一栢而已卒年八十餘子嶧

嶧字仲連姿稟淳慤恬於榮利父子兄弟相為師友嶧  
與方惟深林處為忘年交後以年格建炎登極推恩  
調迪功郎安遠尉非其好也所居五柳園松窓蓬戶  
植竹疏沼人目為隱君子步趨言動皆有尺度賓嘉  
喪祭率循古法用杜甫詩名所居曰如村累舉命官

終不仕紹興中卒年七十九詩文簡古有如村冗藁  
二十卷子曰百能

百能字少明紹興進士知衢州江山縣有惠愛乾道初  
授諸王官大小學教授嚮進用矣以年至力請老廷  
議嘉之授左奉議郎賜緋衣銀魚致仕而歸築堂曰  
宜休錙銖軒冕殆其天性久之卒年七十四子耕

侍其沔字國紀上世自高密徙吳沔為學貫穿經傳與  
人交如淡薄遇其急奮義以往不避艱險五舉禮部

退為鄉先生治平三年沒門人弟子相與議其治行  
謚曰夷晦滕元發志其墓云士生斯世有進取出力  
得時行道功烈被於民者有行義修潔退而講學為  
一鄉之善士者斯二者用捨不同要皆天下之強立  
君子也善士蓋指汚其慕尚之如此

顧禧字景繁祖沂字歸聖知龔州父彥成字子英兩浙  
運使皆有賢名禧雖受世賞不仕居光福山中閉戶  
讀誦博極墳典所著書甚富注蘇文忠公詩尤詳紹

興間郡以遺逸薦閒居三十年不出

章康字季思都官郎中甫生惠惠生漢卿漢卿生頴皆  
隱居不仕康頴之子也安貧樂道居城西田屋粗給  
閉戶不染世俗出入徒步人尊稱之曰聘君平生足  
迹未嘗越州境而四方之人無不知有章季思士大  
夫過吳以不見為慊嘗問學於朱熹熹有所契日以  
詩陶寫遇紙即書人人取去以此終身不厭年七十  
步履如飛或訝其有方外之遇問之康云吾師聖賢

無外學也淳祐五年忽謂其子仲肯曰吾死有期預書墓蓋以明年卒年七十九終時正寢梁壞有聲人皆異之郡人胡淳從康遊歲時致醪醴薪米所著雪厓文集十卷詩集五十卷淳字以初

陳深字子微世為吳人生於宋習舉子業宋亡棄故習篤志古學閉門著書有讀易編讀詩編春秋編弟子甚衆且有高名深書筆亦精天厯間天章閣建以能書薦之潛匿不出以終別號寧極學者稱寧極先生

子植字叔方少負才氣喜與倜儻之士游既而折節讀書克繼父業有孝行晨夕躬事庖饌親之中裙廁  
踰手自浣濯更世變以琴書自娛屢辟召皆不起植  
子紹先自有傳

韓奕字公望宋忠獻魏王琦之後其先自安陽再徙  
居吳之樂橋父凝工醫在藝術傳奕幼端重簡默動  
作循矩度雖居廛市而樂事遊覽放浪山水間褐衣  
芒屨一童自隨往來山僧野客家累月不去或時藉

草而坐微吟長嘯人莫測其意性穎敏博學尤工於詩洪武中與王賓俱隱於醫賓既為郡守姚善所禮乃復因賓致奕奕終不往一日與賓詣之奕走楞伽山善隨至奕泛小舟入太湖善嘆曰韓先生所謂名可得聞身不可得而見也所著有韓山人集

王賓初名國賓字仲光長洲人博綜文籍經史諸子歷數兵政百氏小說靡不該貫而制行奇狷不娶不宦貌甚寢又以藥點面及肘股為創髮短衣或箕



踞道傍爬搔雖知者亦不敢薦達姚善為守特往求  
見賓執禮抗節風軌甚高與韓奕事皆互見善傳性  
至孝奉母甚篤年七十病革抱母不舍死而復蘇呼  
母連聲始絕既葬神歸于家方午聞其杖履聲呼母  
曰孃孃兒舍孃孃不得良久乃滅自號光菴所著有  
光菴文集吳中名賢紀錄吳下古跡詩

杜瓊字用嘉吳縣人生一月而孤母顧育而教之長  
從陳繼先生學博綜古今為文和平醇實而必本於

理詩尤沉著古雅有風致間寫山水尤潤秀可觀性  
至孝父蚤亡念不得見從人問知其容儀徃徃形諸  
夢寐以父名玉終身諱之嘗割股已母疾有司將上  
其孝瓊曰此豈得已邪惟母節未白可念耳有司以  
聞遂得旌其母每求賢詔下有司輒以瓊應皆辭不就  
雖介特有守而不為過矯之行所居在城西有隱居  
之趣其東有原學者稱東原先生年七十有九卒三  
吳交從會葬者千餘人因私謚曰淵孝先生今列祀

鄉賢祠所著有東原齋卷紀善錄耕餘雜錄

龔訓字大章崑山人父譽洪武初為給事中謫戍死  
訓少依母族冒姓王氏既長隱迹田里肆力經書晝  
夜不輟尚書周忱屢至其家資訪時政兩薦為松江  
太倉教授皆不就田三十畝力耕自給晚歲獨與  
一老婢居破廬中種荳植麻詠歌自適沒年八十餘  
門人私謚曰安節先生

邢量字用理長洲人隱居葑門以醫卜自給性狷介

不娶與人無將迎足跡不出里門不畜奴婢敝屋三  
間青苔滿壁折鐺敗席蕭然如野僧長日或不舉火  
客至相與清坐而已其學自經史外凡釋老方伎之  
說無所不通室中臥榻之外皆藏書並手自校定或  
叩之信手舉似不事翻檢文章古簡亦不苟作同邑  
沈誠字希明生稍後隱操亦高雖居通衢鄰里莫識  
其面朝士有欲過之者固謝不納誠博學問無不知  
然短於著述故無所傳云

人物十七 薦舉

莫禮字士敬吳江人洪武中以稅戶人材徵授戶部  
員外郎與同官沈玠王公讓張瑾楊德彛徐衍龔達  
可潘賢金伯中李鼎十人同日上疏辭祿詔許之秩  
滿超陞本部右侍郎轉左侍郎俄坐黨事卒臨刑賦  
詩有一心忠義堅如石惟有皇天后土知之句人多  
傷之

顧禮字原禮崑山人洪武五年以材幹擢刑部員外

郎八年超遷本部侍郎九年以家屬極刑循例除名  
放還十一年再徵為戶部侍郎遷尚書十三年改刑  
部尚書卒於官

范從文字復之文正公十三世孫六世祖之柔食邑  
於崑遂為崑山人父原良卒官潮州推官從文方弱  
冠匍匐至潮求攢不得日夜號泣俄大雨潰封得函  
骨以歸人稱孝感洪武中以國子生奉使稱旨擢監  
察御史改戶部總部主事奏免株連盜倉罪百餘人

俄為同官所陷得罪且死呼曰幸以先賢赦宥上問  
祖為誰曰范仲淹上曰得非先憂後樂者邪於是末  
減謫役莊浪頃復追戍金齒永樂初以薦起為金華  
訓導歷東安金鄉三學致仕歸年八十餘卒所著有  
小學章詁宗謀譜遺復齋集若干卷

馬達字伯行吳江人洪武中以人材徵授合水縣丞  
以憂去改昌邑為政廉平人不敢干以私粗衣惡食  
其妻不能堪乘間言之達怒曰爾欲使我為善邪為

惡邪後終河間衛經厯

劉以禮字德讓其先汴人祖順之仕平江路掇茶提  
領因家于蘇以禮學識該博儀狀偉然洪武初以明  
經薦授汴縣儒學教諭時學徒久廢以禮力以興舉  
為已任乃舉鄉人張倫為訓導協心教之多所成就  
汴學至今祀之子敏

敏字孟功學行純篤少隨父於任凡可以悅親者為  
之惟恐不及親歿久言及輒淚下仲弟敬久嬰疾藥



餌必手治弗假僕從士有寒而來歸者周之不厭有  
司聞其賢薦授德清縣令鋤強植善民甚懷之後以  
善書徵入翰林擢中書舍人朝士多推重之修撰張  
洪嘗為文贈之曰南北宦遊來京者所稱許必曰孟  
功有不知孟功者蓋非賢也其重之如此卒年七十  
有八

盛逮字景華吳江人父似祖號寓翁者有行義始徙  
郡中洪武初逮以賢良應召賜冠帶叅大臣議事與

中書參政陳寧不合因以疾辭歸弟章以鹽法被捕甚急父憐其少子不忍遣逮請曰弟未有子願就捕因謫戍寧夏先是逮歸鄉里寧適守蘇將甘心焉亟欲見逮不得乃命逮督辦通區逋賦逮傾貲貸民償之友人唐自牧負官租計白金二百兩走告於逮逮如數與之翰林待詔李幹老無所歸逮延之家塾既卒葬於墓側歲時祭之逮嘗遊關中得異人導引法作原道詩卒年九十三子寅御醫有傳

陳則字文度崑山人洪武六年秀才舉任應天府治  
中遷戶部侍郎左遷大同府同知進知府則文詞清  
麗與高啓揚載同稱

沈芳字庭芳崑山人洪武二十六年舉茂才授觀察  
使遷北平左布政使

沈應字德乾郡人洪武中應求賢詔選入文華堂說  
書除江西布政司叅議母喪服闋改山東卒應善為  
詩所著有東澗集

吳簡字仲廉吳江人元季數舉於鄉不利遂杜門績學尋以薦授郡學訓導陞紹興路學錄洪武四年應詔至京以疾辭歸優游林泉號月潭居士年八十二卒所著有論語提要史學提綱并詩集若干卷二子復湖廣僉事顧縣學訓導俱有文名

趙文字宗文長洲人洪武中舉人材以母老歸養永樂五年以翰林典籍梁時薦知鄱陽縣不阿權倖坐謫久之歸卒文淳厚強毅老而持度愈嚴鄉稱篤實

君子所著有慎獨齋文集理學述言弟宗禮兵部郎  
中

袁政字文理吳縣人嘗學於俞貞木永樂七年以薦  
授湘陰典史湘陰民素貧而墮於耕遇征調輒破產  
政為勸課振勵自是民有益藏後以夏原吉薦陞遂  
安知縣未視篆宿於驛亭夢被血小兒數輩挽其衣  
覺而問於父老知邑中生女多不舉即嚴禁之後邑  
中生女多名袁留

沈澄字孟淵長洲人洪武中以人材應薦至京尋引疾歸周文襄公巡撫吳中嘗就澄訪時政多所施行澄雅善詩尤好客海內知名之士無不造之所居曰西莊日與治具燕賓客詩酒為樂人以顧仲瑛擬之翰林金閭坐事繫獄十年衣食之需皆澄周之問嘗謂人曰吾微孟淵為瘦鬼矣年八十有八而終子二貞吉恒吉隱跡尚義有父風俱能詩恒吉尤善畫

李麓字仲怡常熟人永樂末以經明行修薦授崑山

縣學訓導遷山東巢縣教諭荒有文學勤於纂述所著有友梅集崑山常熟崇明三志

章珪字孟端常熟人宣德中應求賢詔授廣東按察司知事入為監察御史嘗讞大辟囚多所平反畿輔旱蝗奏免民租六十餘萬斛後因廷論大臣不職為當道所惡因自解歸四子儀表格律先後登科位皆通顯累贈珪右副都御史格自有傳

宣嗣宗嘉定人永樂中以善書薦入翰林授中書舍

人陞吏部驗封員外郎進郎中卒嗣宗純謹不妄最為宣廟眷禮既卒遣官祭于其家子謙福寧縣丞

伊恒字宗友其先沭陽人宋建炎間始居蘇父彤以間右徙實京師恒好學善書永樂中簡侍東宮特承眷注洪熙初擢冬官營繕所正與翰林修撰金問同被命待詔思善門進尚寶少卿復與問同命景泰中致仕卒年八十餘恒為人恭勤靜退不與時競時稱長者從子侃工科給事中



衛靖字以嘉崑山人洪熙初以能書薦授中書舍人  
直文淵閣陞禮部主事預修宣廟實錄進食五品俸  
靖謹厚能詩所著有公餘清興集

陳述字宗理嘉定人好學能詩以賢良方正被舉任  
湖廣按察司照磨擢監察御史劾弊雪冤多所建明  
歷陞四川布政司左叅政巡撫憲臣以述歷練老成  
識達事機上章薦之述以老懇乞致仕進階二品

姑蘇志卷五十五

欽定四庫全書

姑蘇志卷五十六

明王鏊撰

人物十八 藝術

曹弗興以畫名冠絕一時孫權命畫屏誤墨成蠅權疑其真以手彈之時美有八絕弗興預焉又嘗說溪中見赤龍寫以獻孫皓至宋文帝旱暵取弗興龍置水傍應時雨足南齊去吳未遠謝赫謂弗興之迹殆不可見祕閣之內獨有所畫龍頭嘗畫兵符圖極工祕

而不出

張宏字敬禮郡人善篆隸飛白書妙絕當世人稱其飄  
若游雲激如飛電有飛仙舞鶴之態常戴烏巾時號  
張烏巾歐陽詢謂張烏巾飛白論入神品小篆亦入  
能品

張彭祖郡人澄之子官至龍驤將軍善隸書右軍每見其  
縑素尺牘輒取而藏之梁朝論其書在中之中品子  
敞孫裕尤善行草皆自有傳張氏三世皆以善書名

陸耀郡人善書

陸探微吳人善畫得六法之妙平生愛寫古聖賢像明  
帝時常在侍從二子緩洪緩肅得家學張彥遠論其  
體運道舉風力頓挫一點一拂動筆不凡

顧寶光郡人琛之子也善畫全法陸探微大明中為尚  
書水部郎官至司徒右曹掾尤善行書卓越多奇王  
僧虔嘗作飛帛書以示之寶光曰下官今為飛帛屈  
矣

沈嘉字長茂吳縣人官至吳興太守善草書

張僧繇吳人丹青絕代嘗畫江陵天王寺栢堂作盧舍那像及仲尼十哲明帝怪問釋寺何為畫孔聖僧繇曰後當賴此及廢浮屠法獨此殿有聖人像得不毀又嘗于金陵安樂寺畫四龍不點睛云點之即飛去人以為誕固請點之須臾雷電破柱二龍乘雲去未點者存又畫天竺二胡僧侯景亂折而為二一為唐右常侍陸堅所寶堅疾夢胡僧來告云我有同侶在

洛陽李氏若求合之當以法力助君陸遂往求果得之劉長卿記其事潤州興國寺苦鳩鴿棲梁上穢汙尊像僧繇於東壁畫一鷹西壁畫一鷄皆側首向簷外鳩鴿不敢復入其神妙如此

顧光寶郡人善畫陸溉病風瘡久不瘳光寶嘗詣溉遂命筆圖一獅子像於戶外云旦夕當有驗至夜聞窸窣之聲明日視獅子口有血淋漓溉病遂愈

顏協吳人學書於同郡范懷約藝過其師荆楚碑碣皆

其書懷約官至東宮侍書其書任已作制無大過人  
武帝謂其真書有力草行無功

陸柬之郡人仁公子虞世南甥官著作郎少依舅氏臨  
書冠古無比隸行皆入妙品李嗣真云柬之學虞草  
體用筆則青於藍子彥遠傳父業授張旭旭即彥遠  
甥也

張從申郡人善書世稱獨步擢第為祕書省正字後官  
長史弟從師從儀從約並工書皆得右軍風規人謂



四絕

孫虔禮字過庭郡人官胄曹工書至能品嘗著書論妙盡其趣即書譜也宋高廟垂情藝文嘗謂此譜妙備草法手不少置石本惟禁中太清樓所刻最為精絕其子翔亦善書

張旭草書入神品性嗜酒每大醉叫呼狂走乃下筆或以頭濡墨而書既醒自視以為神不可復得也世呼為張顛初為常熟尉有老人陳牒求判宿昔又來旭

怒其煩責之老人曰觀公筆法奇妙欲以家藏耳旭  
因問所藏盡出其父書旭視之天下奇筆也盡其法  
旭自言始見公主擔夫爭道又聞鼓吹而得筆意觀  
公孫舞劍器得其神後人論書歐虞褚陸皆有異論  
至旭無非之者傳其法惟崔邈顏真卿云餘見宦蹟  
條

史維則字天問工八分飛白二篆在唐以八分名家者  
四人韓擇木蔡有隣李潮與維則也歷翰林學士卒

葬吳城下

史懷則亦工書不減維則蓋維則昆弟也

張瓌

一作藻

字文通吳人唐開元間官至祠部員外郎善

畫自撰繪境一篇言畫之要訣畢宏見而驚異之嘗  
手操雙管一為生枝一為枯枿而四時之行遂驅筆  
得之一時號為神品

顧生大厯中以畫游諸侯之門每畫先貼絹數十幅  
於地乃持墨汁及調諸彩色各貯一器使數十人

吹角擊鼓齊聲喊叫生著錦襖錦纏頭飲酒半酣  
繞絹貼走十餘匝取墨汁攤寫絹上次寫諸色乃  
以長巾一頭覆於所寫之處使人坐壓已執巾角而  
曳之迴環既遍然後以筆墨隨勢開決為峰巒島嶼  
之狀

陸希聲得書法凡五字撇押鉤格抵又云用筆雙鉤則  
點畫尤勁謂之撥鐙法此法傳自二王陸以授沙門  
晉光晉光引薦遂至宰相餘見前傳

紀朋郡人嘗授祕訣于隱士周廣觀人顏色便知疾深淺言之精詳不待候診

周廣開元中召至京師有宮人每日晨則笑歌啼號若狂疾而足不能及地廣曰此必因食飽促力復仆於地而然飲以雲母湯令熟寐寐覺失所苦問之乃言太華公主誕三日宮中大陳歌吹此宮人主謳欲其聲清常食狔蹄羹遂飽當筵歌大曲曲罷覺胸中甚憤戲於砌臺乘高而下未及半復為後來者所激因

仆地比蘇即病狂自是足不能及地又有黃門自交  
廣使回拜舞殿下廣曰此人腹中有蛟龍明當產一  
子即不可活矣上驚問黃門有疾否對曰臣馳馬大  
庾嶺大熱而渴飲於路傍野水今腹中堅痞如石廣  
以消石雄黃煮飲之吐出物數寸其大如指鱗甲備  
具投之水俄頃數尺遽以苦酒沃之復如故形上驚  
異之欲授以官爵固請還吳中水部員外郎劉復  
作傳

石荆山吳人善琴為獨孤及所重召與之游荆山每操  
常以十合小豆為準盡一升而移品

姚兼濟吳人善琴得石荆山之傳在揚州逢異人授以  
琴操撫之果奇兼濟求學焉異人乃授以清風景雲  
等五調人以為廣陵散之遺音也

羅塞翁隱之子為吳中從事善畫羊精妙卓絕

滕昌祐字勝華工畫花鳥蟬蝶折枝生菜傳彩鮮澤宛  
有生意尤長於畫鷺先為吳人後游蜀以文學從事

初不婚宦志尚高潔脫略時態

李成吳人五代末以畫知名宋初衛融知陳州聞其名  
召之乃挈家而往

丁德隅晉公謂之孫工篆書

朱象先字景初吳江人善畫馳名元符間蘇軾跋其畫  
謂以其不求售故得之自然

何充郡人能寫貌擅藝東南

張涇郡人米芾稱其翎毛蘆鴈不俗



毛松崑山人善畫花鳥四時之景子益乾道間畫院待  
詔並子允升景定中畫院待詔皆工花鳥能世家學  
呂彥直蘇州裱匠之子為三館胥駙馬王詵留門下使  
雙鉤書帖嘗模黃庭一卷上用所刻勾德元圖書見  
米氏書史

張炳炎咸淳中及第其父大理評事肖說嘗與徐南溪  
論琴得其所著琴書以遺俞琰故吳中有其傳

陸友字友仁博雅好古工漢隸八分書尤能鑒辨鍾鼎

銘刻法書名畫皆有精識嘗至都下虞集柯九思薦  
言于上未及用歸嘗著硯史墨史印史

李世英字伯英長洲人精書學作韻類三十卷其義以  
字為本音為幹義訓為枝葉自一而二井井不紊凡  
十年而成書從子文仲又本說文作字鑑五篇辯點  
畫刊除舛謬以備一家之言于文傳黃潛為之序

葛應雷字震父吳人攻於醫嘗著醫學會同二十卷推  
五運六氣之標本察陰陽升降之左右以定五臟六

腑之虛實合經絡氣血之流注而知疾病之候死生  
之期處方制劑砭砢率與他醫異時按察判官李某  
中州名醫也因診父疾復咨於應雷聞其答父子相  
顧駭愕曰南方亦有此人邪迺盡出所藏劉守真張  
潔古書與之討論無不脗合而劉張之學行於江南  
者自此始由平江醫學教授陞江淞官醫提舉子乾  
孫自有傳

王履字安道崑山人學醫於丹溪朱彥修遂盡其術

嘗謂張仲景傷寒為諸家祖後人雖多立論不出其藩籬且素問云人傷於寒為病熱言常而不言變仲景推寒熱之故履乃備常與變作傷寒立法考又謂諸病陽明篇無目疼少陽篇言胸脇滿而不言痛太陰篇無噎乾厥陰篇無囊縮凡此必有脫簡以三百九十七法去其重複者僅二百三十八條乃合作傷寒三百九十七法極論內外傷經旨異同并中風中暑辨議名曰渢渢集共一卷標題原病式一卷百病

鈎玄二十卷醫韻統一百卷履篤志於學博極羣書  
為文若詩皆精詣有法畫師夏圭行筆秀勁布置茂  
密評者謂作家士氣咸備元季遊華山作四十餘圖  
書紀遊詩其上至今藏好事家

趙良仁字以德其先於宋有屬籍良仁少試吏憲司  
即棄去從丹溪朱彥修學醫治療多有奇效名動浙  
西東所著醫學宗旨金匱方衍義并丹溪藥要等書  
張氏據吳良仁挈家去浙後復來吳占籍長洲以高

壽終子友同自有傳

黃公望字子久本常熟陸神童之弟出繼永嘉黃氏  
黃氏父年已九十始得之曰黃公望子久矣因而名  
字焉性聰敏博極羣書於技能無不通曉補浙西憲  
掾以忤權豪棄去黃冠野服往來三吳開三教堂於  
蘇之文德橋三教中人多執弟子禮晚愛杭之笥箕  
泉結菴其上將為終老計已而歸富春年八十六而  
終公望善畫山水初師董源巨然後稍變其法自成

一家所著寫山水訣至今人多倣之

宋克字仲溫長洲南宮里人少跌宕不羈好馳馬試  
劍究韜略將北走中原會道梗弗果家居以氣節自  
勵性抗直人有過輒面折之無少容與人論議據事  
析理期於必勝一旦厭事杜門謝客操觚染翰日費  
千紙遂以書名章草久不傳至克始得其法筆精墨  
妙可與古人並驅一時學者濶倒然妙處終不似也  
洪武初同知鳳翔卒時有宋廣字昌裔者亦善草書

與克頡頏人稱為二宋云

趙原字善長吳人號丹林畫師董源甚得其骨格國  
初召天下畫士至京圖歷代功臣原以應對不稱旨  
坐死

張觀字可觀嘉定人少遊江湖志尚古雅工畫山水  
師夏圭馬遠及見盛懋丁野夫而與吳仲圭遊故其  
筆力古勁無俗弱之氣尤善鑒古器物書畫嘗從居  
華亭再徙嘉興洪武中還吳寓長洲之周莊卒



史謹字公謹太倉人洪武中從戍雲南薦授應天府  
推官左遷湘陰丞罷謹性高潔耽吟詠工繪事有獨  
醉亭集

韓凝字復陽系出魏國忠獻王琦精于醫張氏入吳  
收引士類凝隱居不仕子二奕夷奕在隱逸傳夷字  
伯翼少失母凝命奕育之為後因名詒孫洪武中為  
郡醫學正科永樂二年從兄太醫院使夷言於上召  
授御醫改名夷字公達賜第致和街繼陞院判奕卒

陳情得賜假歸葬仍給葬費永樂十一年扈駕北巡  
歸病不能朝上命中貴視疾遣人龜卜既沒歎悼賜  
葬祭視三品奭字公茂凝弟冲之子洪武末為燕府  
良醫正從文廟靖難陞太醫院判進院使扈駕北巡  
永樂九年歸京卒亦用三品禮葬奭兄弟同時被遇  
仕皆通顯而奭子傳亦官御醫與奕子有有子充奕  
從子襄皆守世業

劉觀字士賓長洲人世以醫顯父毅為燕府良醫後

坐事謫戍沒永樂初追念郎臣召觀還擢御醫賜居  
第凡中外親藩貴戚及公卿近臣有疾多命往治尋  
陞院判掌院事扈從北征歸卒子溥自有傳孫倫字  
宗序成化中為御醫

盛寅字啟東吳江人少從王賓學醫永樂間治內侍  
蠱症有奇效名聞于上授御醫在上前持論梗梗上  
甚重之扈從北征洪熙初命掌太醫院賜勅褒嘉宣  
德中嘗應制賦瑞雪詩及嘗與同官奕於御藥房駕

猝至不及屏因命終局且令賦觀奕詩明日有御製  
之賜弟宏字叔大與寅同馳名亦入為御醫景泰初  
治宮妃疾有效當進官不拜乞落其家籍詔許之尋  
乞致仕寅子僕孫愷俱以醫能世其家有劉毓字德  
美其傳出自寅與李懋字思勉者成化間俱官至御  
醫

沈以潛名玄以字行其先由汴徙吳高宗親書良惠  
二字賜之祖伯新父日章皆有醫名以潛少孤能自

刻勵宣德初徵入為醫士未甚知名會院判蔣用文  
病上遣中使問之曰卿即死誰可代者用文書以潛  
名進即擢為御醫進對稱旨上謂用文能知人以潛  
不負所舉以潛為人平易質重工詩好琴有集行世  
子寅孫熙守其業

吳誠字誠伯常州人父可大徙家于吳以醫名誠世  
其業尤于傷寒著名自後有施宗文盛文繼者俱以  
傷寒著奇驗

錢瑛字良玉世傳顧頤醫宣德中入太醫院寧陽侯  
孫生九月驚悸數啼而汗百方莫效瑛後至乃命坐  
兒于地使掬水為戲驚啼頓止人問之曰時當季春  
兒豐衣帷處不離懷抱其熱鬱安所泄邪使之近水  
則火邪殺得土氣則藏氣平故不藥而愈子恒愷悌  
愷世其業恒仕至太醫院判與愷尤有名又有陳公  
賢者其先為孟景暘館甥孟氏亦以顧頤鳴遂得其  
傳成化間公賢徵為醫士入御藥房用藥屢效授御

醫進太醫院判致仕卒賜諭祭蓋吳下小兒醫稱錢氏陳氏云

沈遇字公濟吳縣人號曜樵其先有肖鑑者宋咸淳中寫照有名遇善山水淺絳丹青種種能之晚工雪景永樂末嘗召見歸以高年終

謝晉字孔昭吳縣人號葵丘工畫山水重疊爛熳千幅不同尋丈之間不日而就亦能詩有蘭亭集

蘇復字性初長洲人以貢為綿州知州作畫師盛懋

後宦游歸盡變舊習然不苟作終歲不能脫一幀孔  
昭之速性初之遲各擅其所長同時有范遲陳復成  
化中有陳遲亦皆以畫得名

馬軾字敬瞻嘉定人精於繪事與錢唐戴文進同馳  
名于京師時有李在謝庭循輩亦能畫然其筆法瀟  
灑則不逮軾正統己巳以天文生從征廣東謀畫占  
驗見用仕為刻漏博士子愈字抑之天順甲申進士  
能詩善書尤長於南詞樂府縱佚不羈官止刑部主



事

王敏字時勉仲光之從孫少孤貧從韓伯承盛啓東  
學醫名日起一婦人病血蠱衆治之不愈敏曰娠耳  
當得男投之安胎劑果得男海道總帥燕客飾伶人  
為女子佐酒無疾也敏視其頰頰面青羸而氣微促  
語帥曰火克金之兆也火令司天其殆矣明年六月  
嘔血死千戶申志年近二十忽瞑眩譫語體熱而咳  
衆以傷寒治敏曰痘也與升均湯而瘡出一人痘發

背不起瘍醫言起則治矣敏曰是擊指脉即起亦不  
治衆刼以艾疽起如粟衆曰無傷矣竟三日死平日  
治士夫甚多不受其報王氏醫亦以保元氣為主敏  
與張頤同時敏年差少頤以瞽敏以瞶而皆有名于  
吳下

附 雜伎

干將吳人與歐冶子同師莫邪干將之妻干將作劒米  
五之鐵精六合之金英候天伺地陰陽同光百神臨

觀天氣下降而金鐵之精不銷干將不知其由莫邪  
日子以善為劍聞於王王使作劍三月不成其有意  
乎干將曰吾不知其理也莫邪曰夫神物之化須人  
而成今夫子作劍得無得其人而後成乎干將曰昔  
吾師作冶金鐵之類不銷夫妻俱入冶爐中然後成  
物後世即山作冶麻經姦服然後敢鑄金於山今吾  
作劍不變化者其若斯邪莫邪曰師知爍身以成物  
吾何難哉於是干將妻乃斷髮剪爪投於爐中使童

男童女三百人鼓橐裝炭金鐵乃濡遂以成劍陽曰  
干將陰曰莫邪陽作龜文陰作漫理干將匿其陽獻  
其陰闔閭甚重之會魯使季孫來闔閭使掌劍大夫  
以莫邪獻之季孫拔劍之鏹中缺者大如黍米歎曰  
美哉劍也雖上國之師何能加之夫劍之成也吳霸  
不缺則亡矣我雖好之其可受乎不受而去干將墓  
在匠門外東數里丞平時人耕其旁忽有青蛇繞足  
其人驚遽以刀斷之其前半躍入草中不復見徐視

其餘乃折劍一段至暮欲持歸亦忽失之

歐冶子吳人善鑄劍一曰純鉤二曰湛盧三曰豪曹四曰魚腸五曰巨闕秦客薛燭善相劍越王取豪曹巨闕魚腸示之燭曰非寶劍也取純鉤示之燭曰光乎如芙蓉始生取湛盧示之曰善哉允常以湛盧獻吳公子光弑王僚湛盧乃去楚

互見古跡

吳市吏者公子光欲謀殺王僚未有可與議者乃命善相者為吳市吏伍子胥至吳被髮佯狂跣足垢面行

乞於市市吏見之曰吾相人多矣未嘗見斯人也非異國之亡臣乎遂與俱見王僚

公孫聖吳王夫差時人夫差興兵將與齊戰道出胥門假寐於姑胥之臺夢入章明宮見兩鑪蒸而不炊兩黑犬嗥以南嗥以北兩鑪殖宮牆流水湯湯越其宮堂後房鼓震篋篋有鍛工前園橫生梧桐命大宰嚭占之嚭曰美哉王之伐齊也章者德鏘鏘也明者破敵聲聞昭明也兩鑪蒸而不炊者聖德氣有餘也兩

黑犬嗥以南嗥以北者四海服朝諸侯也兩鋸殖宮  
牆者農夫就成田夫耕也流水湯湯越宮堂者鄰國  
貢獻財有餘也後房篋篋鼓震有鍛工者宮女悅樂  
琴瑟和也前園橫生梧桐者樂府鼓聲也吳王大悅  
而心不已復召王孫駱問之駱曰臣鄙淺不能占東  
掖門亭長長城公弟公孫聖多見博觀知鬼神之情  
狀願王問之王乃召公孫聖聖伏地而泣其妻謂曰  
子何性鄙今王急召乃涕泣乎聖曰悲哉非子所知

今日壬午時加南方命屬上天不得逃亡非但自哀  
誠傷吳王吾受道十年隱身避害欲紹壽命不意急  
召中世自棄故悲與子相離耳遂詣姑胥臺吳王告  
其夢聖曰臣不言身名全言之必死於王前臣聞章  
者戰不勝敗走倥偬也明者去昭昭就冥冥也入門  
見鉦蒸而不炊者不得火食也兩黑犬嗥以南嗥以  
北黑者陰也北者匿也兩鋹殖宮墻者越軍入吳伐  
宗廟掘社稷也流水湯湯越宮堂者宮室墟也後房



鼓震篋篋者坐太息也前園橫生梧桐者梧桐心空  
不為用器但為育僮與死人俱葬也願大王按兵修  
德遣下吏肉袒徒跣稽首謝於勾踐國可安存身可  
不死吳王怒曰吾天之所生神之所使顧力士石番  
以鐵鎚擊殺之

姚光吳人有火術吳王臨試之積薪數千束裹之因猛  
風而燔薪盡光端坐灰中振衣而起把一卷書吳王  
視其書不能解也

趙達吳人

或曰河南人

少從漢侍中單甫學九宮之術能應

機立成問對若神至計飛蝗射無不中或難曰飛者固不可校此殆妄耳達使其人取小豆數斗播之席上立知其數嘗過故知為之具食且曰倉卒乏酒又無嘉殽達取盤中隻箸再三縱橫之乃言卿東壁下有美酒一斛鹿肉三斤何以辭無酒殽主者笑曰以卿善射特相試耳又書簡上作千萬數著空倉中封之令達筭之達云其數有名無實其精微如此吳主

孫權吳太平二年長沙大饑殺人不可勝數孫權使  
達占之曰天地川澤相通如人四體鼻衄灸脚而愈  
今餘干水口暴起一洲形如鰲食彼郡風氣可祠而  
掘之權乃遣人祭以太牢斷其背長沙饑遂止達死  
權究其術祕不出發棺求之竟無所得

吳泰能筮會稽盧氏失博山香爐使筮之泰曰此物質  
雖為金其象寶山有樹非林有孔非泉闔閭晨興見  
發青煙此香爐也語其處求得之

褚胤郡人年七歲善棊及長冠絕當代父榮期與臧質  
同逆胤從誅何尚之謂胤之奕妙冠古今因父受戮  
特痛惜之

褚思莊以善奕名世琅琊王抗第一品思莊與會稽夏  
赤松第二品夏思速善於大行思莊思遲巧於鬪宋  
文帝時羊玄保為會稽帝遣思莊與玄保戲因製局  
圖還於帝前覆之齊高帝使思莊與王抗對奕自食  
時至暮一局始竟上倦遣還省至五更方決抗睡於

局後思莊達旦不寐思莊所以品第致高緣其用思  
深久人不能當二人並官給事中

楊惠之初與吳道子同師學畫見道子藝成惠之耻焉  
更為望工遂為天下第一手故中原多其手制山水  
之壁為崑山慧聚寺毘沙門天王像形模如生其傍  
二侍女尤佳徐林嘗記其像謂得望工三昧戒後人  
不可妄加修飾後果為俗工修治遂失初意

席謙郡人梓州肅明觀道士善棊杜甫詩云席謙不見

近彈碁

朱景環筭術精妙設肆盤門驛貞明中廣陵王錢元璪鎮吳環上書云到任當三十年安寧元璪未信命焚之至天福辛丑記其事召問之景環曰曩固言矣及期薨時有顏規本郡之五工也王嘗召景環問遁甲事規解五便廳熟聞之他日質於景環遂精其術王嘗欲享廟規上書言翌日利五鼓之前如寅時則杜門在南不可出入不聽果寅時王車出南門鑠鑰壞

又不能啓遂破鑰而出由是知其神驗乃以為軍師  
張珙妙於刊鏡趙疎為兩浙漕日以重定王會圖方一  
尺有半字如蠅頭而體制精楷俾珙刊之三年而成  
僧妙應俗姓童氏淳熙中居龍興寺嘗模廬山王瀚須  
菩提像於寺中其陰作五百尊者筆法奇古又於虎  
丘作石觀音像亦佳

祝庶幾郡人通象緯之學累赴鄉舉不中第景德中  
求試所習以為司天靈臺郎

李珣吳人善律歷紹聖二年曾肇為滁州守命珣為漏壺以順晝夜時咸則之

丁真一吳郡道士善製墨面云玄中子

王惟清製墨面云淨名齋幕云姑蘇山人王惟清又二品襄陽米元章家所造

胡舜申紹興間自績溪徙于吳通風土陰陽之術世所傳江西地里新法出於舜申嘗行郡四郭而相之以為蛇門不當塞作吳門忠告一篇文載城池條



范疇字復初本金華人嘗為洞霄宮道士得江西張九  
牛著易之占神妙莫測杭有無藉子胡婆壽負罪而  
逃官督捕嚴捕者即疇求筮爻成疇曰可於北方樹  
木中得之如言跡至臨平果獲於空楊樹中遂繫獄  
後會赦出欲報疇持刀晨叩疇門給以卜欲賺出殺  
之疇決以占知其將不利於己隔門謂之曰欲問卜  
可擲下手中刀胡聞之駭服猶以刃畫其門而去疇  
由是來蘇避之寓乘魚橋設肆疑者來問莫不神驗

朱珪字伯盛崑山人師吳睿大小篆尤善摹刻嘗取王厚之趙孟頫吾衍三家印章譜說并睿與已所製印文篆例為書曰文集考又有名蹟錄即珪素所刻名文也性孤潔不娶而終

袁遇昌居吳縣木瀆善望化生摩睺羅每搏埴一對價


三數十緡其衣襤腦頤按之蠕動遇昌不傳其子藝

遂絕

互見  
土產

王某者郡中漆匠也至正間嘗以牛皮製一舟內外飾

以漆解卸作數節載至上都游漾灤河中可容二十  
人上都之人未嘗識舟觀者異之又嘗奉旨造渾天  
儀可以折疊便於收藏其巧思出人意表遂命為管  
匠提舉



姑蘇志卷五十六

欽定四庫全書

史部

姑蘇志卷五十七

詳校官編修<sub>臣</sub>曹振鏞

檢討<sub>臣</sub>德生覆勘

總校官知縣<sub>臣</sub>楊懋珩

校對官中書<sub>臣</sub>李 燾

謄錄監生<sub>臣</sub>俞成鰲

欽定四庫全書

姑蘇志卷五十七

明 王鏊 撰

人物二十 游寓

澹臺滅明字子羽孔子弟子南游至江從弟子三百人  
設取予去就名施乎諸侯索隱注吳國東南有澹臺  
湖即其遺跡也

東方朔厭次人久在吳中為書之師數十年武帝時上  
書說便宜拜為郎至昭帝時人或謂聖人或謂凡人

作深淺顯默之行或忠言或詼語莫知其旨詳見漢書

梅福字子真壽春人成帝時上書言大將軍王鳳專勢擅朝再上書以為宜建三統封孔子之世為殷後皆不納福居家常讀書養性為事王莽專政福一朝棄妻子去九江至今傳以為僊其後有人見福於會稽者變姓名為吳市門卒

梁鴻字伯鸞扶風平陵人家貧尚氣節嘗作五噫歌肅

宗聞而非之求之不得易姓名挈妻子適吳依大家  
臯伯通居廡下為人賃舂每歸妻為具食不敢於鴻  
前仰視舉案齊眉伯通察而異之曰彼傭能使其妻  
敬之如此非凡人也乃舍之於家疾且亟告主人曰  
昔延陵季子葬子於贏博之間不歸鄉里慎勿令我  
子持喪歸去及卒伯通為葬于要離塚傍曰要離烈  
士伯鸞清高可令相近葬畢妻子歸扶風

桓譚字文林沛郡人榮五世孫也仕郡功曹後舉孝廉



有道方正茂才三公並辟皆不就初平中避地會稽  
按東觀記桓驥到吳郡揚州刺史劉繇振給穀食衣服所乏者悉不受及適會稽止山陰相故鍾離意舍太守王朗給梁食布帛臨去一無所留焉

蔡邕字伯喈陳留人仕漢左中郎將從朔方還避怨于吳顧雍從學琴書吳人有燒桐以爨者邕聞火烈之聲知良木也材以為琴果有美音而其尾猶焦時名焦尾琴詳見後漢書

戴逵字安道譙國銍人善琴書會稽多名山故世居剡

下晉孝武帝時以散騎常侍國子博士累徵辭父疾  
不就郡縣敦逼不已乃逃于吳內史王恂有別館在  
武丘山逵潛詣之與珣游處積旬號為吳中高士會  
稽內史謝玄慮逵遠遁不返請絕召命逵復還剡時  
會稽謝敷字慶緒澄靖寡欲入太平山十餘年召皆  
不就初月犯少微少微一名處士星占者以為隱士  
當之逵有美才人或憂之俄而敷死故會稽人士以  
嘲吳人云吳中高士求死不死逵子顥

逵弟遜字安丘以武力顯

顥字仲若及兄勃竝受琴於父桐廬縣多名山兄弟因  
留居止勃疾患醫藥不給顥欲干祿以為養乃求海  
虞令事垂行而勃卒乃止復出居吳下吳下士人共  
為築室聚石飲水植林開澗少時繁密有若自然乃  
述莊周大旨著逍遙論禮記中庸篇三吳將守及郡  
內衣冠要其同遊野澤堪行便去不為矯介衆以此  
多之宋元嘉中徵竝不就衡陽王景季鎮京口長史  
張邵與顥姻通迎來止黃鵠山有竹林精舍顥憩于

此間文帝每欲見之謂黃門侍郎張敷曰吾東巡之

日當宴戴公山下也

按顯女妻邵之子敷  
寰宇記云勃字長雲

褚伯玉字元璩錢唐人卓有隱操居剡瀑布山下三十  
餘年王僧達為吳郡禮致之停車信宿交數言而退  
寧朔將軍丘珍孫與僧達書曰聞褚先生出居貴館  
此子減景雲栖不事王侯有年載矣自非折節好賢  
何以致之僧達答曰褚先生從白雲游舊矣冀其來  
比談芝桂借訪薜蘿若已窺煙液臨滄洲矣唐丘丹

詩云還同褚伯玉入館忝州人

張祐字承吉南陽人寓居蘇州有詩名白居易刺杭時江東進士多奔杭取解屬時以素望取士祐自意必首薦既而徐凝冠多士祐遂偃蹇不隨鄉試令狐楚鎮天平表祐新舊格詩三百篇以獻祐至京師為元稹所抑寂寞而歸嘗自號釣鰲客會昌初李紳節度淮南壯其為人厚加禮致祐長於宮詞掖庭多吟諷之杜牧守池與祐為詩酒友寄詩云誰人得似張公

子千首詩輕萬戶侯當時以為故實大中間卒於丹陽

張景修字敏叔常州人治平進士寓居郡中少刻苦作詩至老不衰初為浮梁令邑子朱天錫以神童應詔景修作詩送之天錫到闕忘取本州公據為禮部所拒因擊登聞鼓繳景修所送詩為證神宗一見大稱賞之語王珪曰恨四方有遺材趣令召對珪言不欲以一詩召人恐長浮競俟其扶滿赴部令中書籍記

姓名比景修罷官而神宗崩矣景修歷官三朝兩為  
憲漕五典郡符每登對上必問卿作朱童子詩試  
為舉似由此詩名益著官至祠部郎中卒年七十餘  
有詩集藏于家子漢之知崑山縣

米芾字元章襄陽人愛潤州山水結海嶽菴嘗游寓于  
吳子友仁官于是女亦歸于是故宋史稱為吳人  
賀鑄字方回衛州人孝惠皇后族孫幼不羣長七尺面  
鐵色眉目聳拔喜談當世事不少假借雖大權貴小

不合意極詆無遺辭人以為近俠博學強記工五言  
深婉麗密如次組繡尤長於度曲掇拾人所棄少加  
隲括皆為新奇自言吾筆端驅使李商隱溫庭筠當  
奔命不暇諸公貴人多客致之或從或不從其所不  
欲見終不貶也歷和州管界巡檢李清臣范百祿蘇  
軾薦改承事郎監北嶽廟鄂州寶泉監通判泗州遷  
太平州管勾亳州明道宮乞致仕從臣薦起之管勾  
洞霄宮復致仕卒年七十四鑄監太原工作有貴人



子同事驕倨不相下鑄廉得盜工作物屏侍吏閉之  
密室以杖臨責貴人子駭謝有之鑄曰能從吾治免  
白發即起自袒其膚杖之數下其人叩頭祈哀鑄大  
笑釋去自是諸挾氣力頡頏者皆不敢仰視時米芾  
以魁岸奇譎知名鑄以氣俠雄爽適相見後每相遇  
輒瞑目抵掌論辯鋒起終日各不能屈談者爭傳為  
口實然為吏極細在筦庫嘗自會計室鑄漏逆姦欺  
無遺察治戎器堅利為諸路冠職巡邏日夜行所部

歲裁一再過家盜不得發攝臨城令三日決滯訟數  
百邑人駭歎觀其骀駸任氣若無所顧忌者然遇仕  
進會恒如臨不測淵其慮遠乃如此自食祠祿退居  
吳下昇平橋及橫塘別墅稍務引遠世故無復軒輊  
如平日藏書萬餘卷手讎校無一字誤家貧貸子錢  
自給有負者輒拆券與之秋毫不以丐人建中靖國  
間黃庭堅自黔中還得其江南梅子之句以為似謝  
玄暉有東山樂府五百首慶湖遺老集二十卷

蘇舜欽字子美銅山人唐相頤之後祖易簡參知政事  
父耆工部郎中直集賢院有才名舜欽少有大志狀  
貌怪偉當天聖中文體多偶對獨舜欽與穆修好為  
古文歌詩一時豪俊從之遊初以任補太廟齋郎調  
滎陽尉玉清昭應宮災舜欽詣登聞鼓院上疏極陳  
得失景祐初舉進士改光祿寺主簿知長垣縣遷大  
理評寺監在京店宅務康定中地震詣匭言事甚切  
直慶厯中以范仲淹薦為右集賢校理監進奏院舜

欽娶杜衍女衍時與仲淹富弼在政府引用聞人欲更張庶事御史王拱辰等不便其所為會進奏院祠神舜欽與劉巽輒用鬻故紙公錢召妓樂夕會客拱辰諷其屬劾奏因欲搖動衍於是舜欽巽坐除名同時會者皆知名士因緣得罪逐出四方十餘人拱辰等喜曰吾一網打盡矣五年來寓蘇州友人韓維責以離先世居隔絕親友舜欽報書曰蒙責以兄弟在京師不以義相就獨羈外數千里自取愁苦予豈無

親戚之情會合之樂安肯舍安逸而甘愁苦哉昨在京師不敢犯人顏色不敢議論時事隨衆上下心志蟠屈固亦極矣不幸適在嫌疑之地不能決然早自引去致不測之禍猝下吏人無敢言共起謗議被廢之後喧然未已更欲寘之死地然後為快來者往往鈎贖言語欲以傳播故閉戶不敢見如避兵寇偷俗如此安可久居其間遂超然遠舉羈泊於江湖之上不惟衣食之累實亦少避機穽也況血屬之多資入

之薄常相團聚可乏衣食乎不可也可閉關常不與  
人接乎不可也與之言必與之還往人人皆如持國  
則可不迨持國者必加釀惡言宣布上下使僕不能  
自明則前日之事未為重也都無此事亦終日勞苦  
應接之不暇寒暑奔走塵土泥淖中不能了人事羸  
馬餓僕日栖栖取辱於都城使人指背譏笑哀憫亦  
何顏面安得不謂之愁苦哉此雖與兄弟親戚相遠  
而伏臘稍足居室稍寬無終日應接奔走之勞耳目

清曠不設機關以待人心安閒而體舒放三桑而眠  
高春而起靜院明窓之下羅列圖史琴尊以自愉悅  
有興則汎小舟出盤閭二門吟嘯覽古於江山之間  
渚茶野釀足以銷憂尊鱸稻蟬足以適口又多高僧  
隱君子佛廟絕勝家有園林珍花奇石曲池高臺魚  
鳥留連不覺日暮昔孔子作春秋而夷吳又曰吾欲  
居九夷觀今之風俗樂善好事知余守道好學皆欣  
然願來過從不以罪人相遇雖孔子復生是亦必欲

居此也以彼此較之孰為然哉人生內有自得外有  
所適固亦樂矣何必高位厚祿役人以自奉養然後  
為樂今雖僑此亦如仕宦南北安可與親戚嘗相守  
耶余窘迫勢不得如持國意必使我尸轉溝洫肉餒  
豺虎而後以為安所義何其忍邪詩曰凡今之人莫  
如兄弟謂兄弟以恩急難必相拯救後章曰喪亂既  
平既安且寧雖有兄弟不如友生謂友朋尚義安寧  
之時以禮義相琢磨予持國外兄弟也急難不相救



又於未安寧之際欲以義相琢磨雖古人所不能受  
予欲不報乃慮吾持國也後二年得湖州長史卒年  
四十一葬丹徒石門山所著滄浪集十五卷時海內  
皆慕舜欽在朝數論事居蘇州得吳越故家池館買  
水石作滄浪亭益務讀書為歌詩以泄憤懣善行草  
每酣酒落筆爭為人所傳寶其雅逸曠遠人以比李  
太白之在江東也嘉祐初韓琦奏追復元官妻杜有  
賢行子泌字進之湖北運使

尹惇字彥明洛陽人師事程頤應舉發策議誅元祐黨人不答遂棄去授徒洛中靖康初布衣召不至褒號和靜處士梅執禮胡安國等奏請優加旌擢不報金人陷洛闔門被害惇死復蘇劉豫以禮聘之溺水逃去自商州奔蜀至閬紹興五年以崇政殿說書召凡二十辭八年冬始入見除祕書郎明年遷太常少卿權禮部侍郎除徽猷閣待制提舉萬壽觀辭不已遂奉外祠即寓平江虎丘西菴時年七十矣卒于會稽

寓舍

張子顏字幾仲循王浚之子寓居平江乾道中以敷文閣待制知信州淳熙中移知紹興除顯謨閣直學士與祠再知鎮江府奏蠲丹陽夫役民甚德之

劉過字改之號龍洲廬陵人宋南渡後以詩俠名湖海間陳亮陸游辛棄疾世稱人豪皆折節與友周必大作相欲客之門下不就故人潘文友宰崑山延致之過雅志欲航海因抵文友死葬馬鞍山中過嘗抗疏

光宗請過宮屢與時宰陳恢復方畧勇請用兵謂中原可一戰而取詞極剴切性喜飲酒詞氣橫放英特兼以感慨一時無前

吳惟信字仲孚湖州人寓居嘉定白鶴村以詩鳴宋季有菊潭集郡人糜先生聲弇諸父也記問該博九經注疏悉能成誦科舉之文未嘗謔卓然垂老不預貢籍見惟信文亟稱之一日相遇扣所作惟信誦一絕云白髮傷春又一年閒將心事卜金錢梨花瘦盡東

風軟商畧平生到杜鵑  
糜不覺下拜曰天才也  
老夫每欲效顰則漢高祖  
唐太宗追逐不少置矣  
蓋前輩服善如此

何執禮淮陽人仕至朝議大夫避亂寓吳袁衣先生之祖也

敖陶孫字器之長樂人慶元進士為泉州僉判有詩名嘗以詩忤韓侂冑幾不免因贅遂居崑山

趙孝孫字仲脩其先洛人建炎中避地寓常熟子思自

有傳

葛立章文康公勝仲子也其先多顯人立章由江陰青陽徙居平江

鄭準字器先開封人華原郡王居中諸孫也祖父皆寓崑山準由蔭補登進士厯知袁州生長王侯家而氣習泊素厚於道義輕財好客赴人之急買田贍族有文正公義莊之風子孺守高郵姪疎知泰韶袁三州鄧若水字平仲井研人博通經史為文章有奇氣吳曦

叛欲殺縣令若水起兵討曦不就乃仗劍徒步如武興欲手刃曦道聞曦死而還人竊笑其狂而壯其志登嘉定進士第對策論史彌遠姦狀乞罷其相考官寘之後列理宗即位應詔上封事言彌遠不立濟王而立陛下握大權以擅國政以盛章輩表裏為姦使區區李全得以倔强於外陛下不加天誅則無以固大位而平大難矣制置司不為附驛還之格當改官為彌遠所抑嘉熙間召為太學博士草數千言大槩

欲斲棺戮尸以正彌遠之罪出通判寧國府書不得  
上旋以言罷遂不復仕隱居洞庭山後歸蜀

魏了翁字華父蒲江人少英悟稱神童登慶元進士歷  
武學博士召試學士院韓侂冑謀開邊了翁言其不  
可甚剴切改秘書省正字徐枋劾之侂冑持不可而  
止後出知嘉定府侂冑誅收召之力辭紹定中累遷  
至同簽書樞密督視京湖軍馬併領江淮封臨邛郡  
開國侯御書鶴山書院四字賜之開府江州已而以



浙東安撫使就醫平江嘉熙初卒累贈太師秦國公  
謚文靖仍賜第於平江葵高景山政學大節具在宋  
史所著鶴山文集一百卷九經要義二百六十三卷  
又有周易集義易舉隅周禮井田圖說古今考經史  
雜錄師友雅言總若干卷

高定子字瞻叔本了翁同產兄也登嘉泰進士累官禮  
部尚書兼直學士院兼侍講代言溫潤朝論推服淳  
祐初為翰林學士知制誥一日草五制未更燭而成

理宗大喜尋拜端明殿學士簽書樞密院事兼參知政事六年起知潭州辭賜第平江仰家橋日以著述自娛官至光祿大夫爵臨邛郡侯致仕卒贈少保定子之學根抵羣經而於諸子百氏博極淹貫為文謹嚴學者稱為著齋先生其仕前後與喬行簡史嵩之不協所著文集六十卷北門類藁十四卷微垣類藁二十二卷緝熙講義三卷奏議一十二卷厯官表奏五卷經說五卷子孫多居常熟定子兄稼字南叔由

進士歷利路提刑知沔州死節贈龍圖謚忠襄廟額  
節愍稼子斯得第進士官至簽書樞密參知政事學  
者稱為耻堂先生

林英發永嘉人以出贅居嘉定由進士知建昌縣時洞  
寇擾攘有戡定功擢知壽昌軍趙興憲嘗師事之及  
知平江迎至郡禮意甚勤既卒為殯于穹窿山初存  
道菴于墓側

黃士毅字子洪虎之子幼知向學徒跣入閩事朱熹熹

命日觀一書夜扣所見告以靜坐勿雜喚醒勿昏居  
數月授以大學章句而歸正慶元詆排道學時也平  
生著書甚多嘗撰次朱子書說文集語類并自類注  
儀禮知府王遂為買宅以居稱為考亭名士卒葬丹  
陽子芝老開慶進士

龔開字聖予淮陰人少負才氣博學好古尤邃經術宋  
季與陸秀夫同居李庭芝幕府宋亡來居吳下節愈  
孤峻嘗作文天祥及秀夫傳吳萊稱其不減遷固居

郡日與高郵龔璠為忘年友時比漢兩龔開詩老蒼  
有骨力間寫山川亦不凡

龔璠字子敬宋司農卿湛之子自高郵徙鎮江以宦游  
久留平江遂家焉少聰敏善屬文刻意學問憲使徐  
琰辟寘幕下又舉和靖學道兩書院山長當路者交  
薦璠宜在館閣不報調寧國路儒學教授遷上饒主  
簿再調宜春丞以浙江儒學副提舉致仕所著曰存  
悔齋藁

印應雷通州人父武子招信軍判官來寓常熟應雷登  
嘉熙進士歷知廬和二州兩淮安撫制置使知揚州  
兼淮東提舉弟應飛字德遠自進士調永嘉尉改淮  
西制機遷戶部侍郎知鎮江府元兵圍鄂師嘗帥救  
之

高晞遠字照菴通州人咸淳德祐間通判平江府自城  
潰家亦散亡晞然一身浮游江湖嘗館於石浦衛參  
政涇家以所學私淑諸人晞遠資稟秀朗學問該博

尤精邵雍之學嘗謂雍觀物以聲色氣味聲色氣味  
有一萬七千二十四人之目若鼻口不能盡其觀與  
嗅嘗唯一萬七千二十四聲可以字別舉聲之一例  
而色氣味可類推也嘗手裁竹為管以定五音六律  
進退疏數細微弗差晚嗜參同契研究甚力嘗謂其  
書大抵以納甲之說寓其行持進退之度然納甲法  
即先天圖也第未知伯陽用虞翻之圖抑虞翻返用  
伯陽之圖耳他凡術數太乙六壬諸家咸究其妙因

動聞聲可以驗吉凶定禍福其學後皆無傳者

錢仲鼎字德鈞通州人徙居蘇之蒲帆巷讀書廣博尤  
潛心六藝宋末發鄉解元不復仕進攻為古文詞與  
趙孟頫虞集龔開輩交性不喜飲惟善勸人讀書授  
徒于家多時俊年餘九十燈下書細字夜分乃寐行  
十餘里不杖

柯九思字敬仲僊居人以廕補華亭尉不就遇文宗于  
潛邸及即位擢為典瑞院都事置奎章閣特授學士



院鑒書博士凡內府所藏法書名畫咸命鑒定賜牙章得通籍禁署寵顧甚隆以言罷出文宗崩因流寓吳中卒九思善畫竹石得文同筆法嘗自謂寫幹用篆法枝用草書葉用八分或用魯公撇筆法木石用金釵股屋漏痕之遺意

潘純字子素廬州人游京師文學貴介爭延致之每宴集談笑傾座嘗著袞卦以諷切當世有以袞受爵亦不足貴之辭或以達于文宗欲繫治之因亡走江湖

間江南大姓慕之者望風承謁於是挈妻子居吳中  
鄭東字季明平陽人客授崑山弟采字季亮性狷介州  
里不能容因來就寓讀四庫書晚又同寓海虞東天  
分絕人嘗就試不合主司即棄去肄力於古作歐陽  
玄嘗薦之會病卒采亦坎壈以終東文多不留藁僅  
存百篇采三十餘篇宋濂所叙聯壁集是也東子思先  
字歐仲洪武中以儒士徵授國子助教遷監察御史  
再遷福建布政上疏請罷爰木進磨勘司令卒

柳貫字道傳浦江人爲翰林侍制以古文與黃潛齋名  
嘗寓甫里

謝應芳字子蘭毘陵人避兵寓居葑門嘗修復顧元公  
榮祠墓有懷古錄一卷平生好古博雅所著曰龜巢  
摘稿

吳叡字孟思濮陽人工篆籀究通六書寓崑山卒

陳徵字明善本廬山人遠祖篆宋宣和進士官左朝散  
大夫徵嘗從吳澄遊其學務明理不慕榮進讀書鼓

琴泊然終身一時前輩若虞揭諸公咸推重之少嘗  
北遊燕趙比還遂居吳中時稱天倪先生二子汝秩  
汝言汝言字惟允閨爽有雋才尤工詩畫張氏時為  
太尉府參謀頗見親信洪武初官濟南府經歷坐事  
卒汝秩字惟寅與汝言齊名而性特高亢不苟合方  
汝言貴顯時聲勢甚盛汝秩安貧樂道若不聞洪武  
中以人才徵至京乞歸卒汝言子繼自有傳

貢師泰字泰甫宣城人泰定四年釋褐出身歷官吏部

侍郎至正十四年江淮兵起京師食不足師泰奉命和糴于浙右得糧百萬石以給京師遷兵部侍郎會朝廷欲仍和糴浙西因除師泰都水庸田使明年罷庸田司遷福建廉訪使尋除禮部尚書時平江缺守廷議難其人又選師泰為平江路總管甫視事張士誠率衆直抵城下攻圍甚急守將弗能支斬關遁去師泰領義兵出戰力不敵亦懷印棄城遁匿海濱者久之士誠既納降丞相達實特穆爾以便宜授師泰

兩浙都轉運鹽使別蠹通利課以大集後以祕書卿  
召卒于道中師泰性倜儻狀貌偉然既以文字知名  
而於政事尤長所至績效輒暴著云

周伯琦字伯溫鄱陽人以父蔭授南海縣主簿三轉為  
翰林修撰後至元初為宣文閣授經郎會御史奏風  
憲宜用近臣特命僉廣東廉訪司事入為翰林待制  
累陞直學士除兵部侍郎至正間以監察御史遷崇  
文太監兼經筵官未幾又以江東肅政廉訪使改浙

西時江浙行省丞相達實特穆爾承制假伯琦參知政事招諭張士誠士誠既降除同知太常禮儀院事士誠留之未行拜江浙行省左丞於是留平江者十餘年士誠滅伯琦乃得歸鄱陽尋卒伯琦儀觀溫雅粹然如玉遭時多艱而善於自保博學文章尤以篆隸真草擅名當時

饒介字介之臨川人以翰林應奉出僉江浙廉訪司事累陞淮南行省參政分守吳中介爽暢博學尤嗜吟

咏精行草日延儒紳談弄篇翰時四方初倣擾郡城  
猶晏然至正十六年三月九日張士誠寇齊門事起  
倉遽介卒無所禦士誠既入據一城鼎沸介無如之  
何閉門高臥而已士誠累使咨訪以事強起之介往  
士誠委以兵政然操縱不由介介固辭士誠命仍送  
回理省事介勸士誠歲輸粟于大都二十七年天兵  
執士誠并俘介歸京師遂死

陳基字敬初臨海人從黃潛學授經筵檢討其徒有



為御史者以所言事咨于基基謂並后為致亂之本  
因草章上諫時欲寘基罪遂引避南歸至吳以教授  
自業屬南北用兵開行樞密府基為都事轉江浙行  
中書省郎中時張士誠為太尉基參謀軍府事及士  
誠自王基獨諫止已而超授內史遷學士院學士階  
通奉大夫一時書檄碑銘傳記多出基手及士誠就  
俘基從入京獨得宥全預修元史書成而還基先居  
郡城天心里洪武二年卒于常熟寓舍基為文清雅

所著有夷白齋藁

姜漸字羽儀諸暨人至正間僑居吳中張氏時起家為淮南行中書左右司都事未幾罷歸日著書無復仕進意洪武初徵拜太常博士卒漸學識超詣所為文溫雅平實

張羽字來儀後以字行更字附鳳本潯陽人刺史戩之後元季倣擾徙家湖州領鄉薦授安定書院山長再徙於吳洪武四年以儒士徵至京應對不稱旨放

還再徵為太常司丞俄坐事謫居嶺南未半道召還  
自沉於龍江驛前羽博學好古文章清潔有法尤長  
於叙事詩亦清麗作畫師小米所著有靜居集

徐賁字幼文本蜀之郫人後居毘陵元季徙居蘇之  
望齊門賁工為詩與高啓諸人齊名尤善寫山水秀  
潤可愛張士誠居吳辟為屬俄謝去居湖州之蜀山  
洪武中以薦至京奉使晉冀及還檢其橐惟紀行詩  
而已他無所有授給事中改監察御史巡按廣東又

改刑部主事陞廣西參政以政績卓異推河南左布政使命大將靖洮岷道出河南以責撫勞不時下獄死所著詩曰北郭集

李幹字貞臣睢州人仕元為許州同知後以其郡侍郎佐庫庫統兵坐營值事急出巡天兵俘置鎮江已而選入司農司議禮議律議官制皆預焉及建六部以為吏部郎中兼秦府相叅軍召議藩封後斥居寧夏又召入為翰林待詔直內閣已老遂致仕來蘇州

依友人盛逮年八十六卒逮為買地黃山葬之幹通  
究典章明國初制作論議英宕一時稱之

吳福字好德浙之鄞縣人由進士擢禮科給事中奉使  
琉球遇颶風中貴人以下皆謀禱於海神福惟戒舟  
師謹檣柁而已使回與修永樂大典出為江西按察  
司僉事入為禮部員外郎與修五經四書性理大全  
書成陞陝西布政司右參政九載陞福建右布政使  
致仕愛吳中山水之秀遂占蘇籍卒葬烏龍山子憲

完憲性至孝母喪過哀事庶母尤孝謹嘗以居室讓諸弟僦屋自處郡人杜瓊贈以詩有今日重逢薛侍中之句後薦授高郵州訓導完伊府教授

人物二十一 列女

許昇妻者呂氏之女也字榮昇少為博徒不理操行榮嘗躬勤家業以養其姑數勸昇修學每有不善輒流涕進規榮父積忿疾昇乃呼榮欲改嫁之榮歎曰命之所遭義無離二終不肯歸昇感激自厲乃尋師遠

學遂以成名尋被本州辟命行至壽春道為盜所害  
刺史尹耀捕盜得之榮迎喪於路聞而詣州請甘心  
讐人榮乃手斷其頭以祭昇乃歲餘姑亡夫族多欲  
聘之誓不再嫁黃巾賊陳寶欲干穢之榮執節不聽  
踰垣而走賊拔刀追之曰從我則生不則死榮曰義  
不受辱寇遂殺之是日疾風暴雨雷電晦冥賊惶懼  
叩頭謝罪乃殯葬之廩府君遣主簿祭之又出錢助  
縣為冢於嘉興耶里墟北名曰義婦阪

沈伯陽妻顧文宣之女字昭君早寡無嗣盡禮供養其姑父陰以許人姑聞而哭昭君驚惶上問姑姑以告昭君泣曰妾聞婦女以專一為貞回二之行非所聞也乃割耳剪髮以明已志

二貞婦者公孫達妻卻李公謀妻戴各遭寇賊臨之以刃曰寧為我妻而生乎將不從而死乎二貞曰婦人以貞淑為節豈可畏死而忘行耶賊遂殺之

孫奇妻廣陵范慎女名姬年十八配奇一年而奇亡父



母以其無子迎還其家姬不肯往迎者迫之姬乃割耳及鼻曰父母迎我者不過以我年少色美今已殘矣行將焉如於是迎者空返

張白妻陸氏績之女也績於鬱林所生因名鬱生年十三嫁同郡張白白兄溫廢徙白死誓不再嫁姚信表

之表曰臣聞唐虞之政舉善而教旌德擢異三王所先是以忠臣烈士顯名國朝淑婦貞女表迹家閭蓋所以闡崇化業廣殖清風使苟有令性幽明俱著苟懷懿姿士女同榮故王蠋建寒松之節而齊王表其里義姑立殊絕之操而魯侯高其門臣竊見故鬱林太守陸績女子鬱生少履貞特之行幼立匪石之

節年始十三適同郡張白侍廟三月婦禮未卒白遭  
罹家禍遽死異郡鬱生抗聲昭節義形於色冠蓋交  
橫誓而不許奉白姊妹險巇之中蹈履水火志懷霜  
雪義心固於金石體信貫於神明送終以禮邦士慕  
則臣聞昭德以行顯行以爵苟非名爵則勸善不嚴  
故士之有誄魯人忘其勇杞婦見書齊人哀其哭乞  
蒙聖朝斟酌前訓上聞天聰下垂坤厚哀鬱生以義  
姑之號以厲兩髦之節則皇風穆暢士女改視矣

張氏三女吳人皆有節行兄溫為孫權所囚姊妹已嫁  
者皆見錄奪其中妹先適同郡顧承官以改嫁丁氏  
成婚有日飲藥而死吳朝嘉歎鄉里圖畫為之贊頌  
會稽張茂妻陸氏吳郡人茂為吳國內史與三子俱為

沈充所害陸傾家業率義部曲討充充敗詣闕上書  
為茂謝不尅之責詔曰茂夫妻忠誠舉門義烈宜追  
贈茂太僕

許邁妻散騎常侍郡人孫宏女也邁一名映字叔玄句

容人總角好道立精舍於抗懸溜山往來茅嶺惟朔

望時節還家定省父母既終乃遣孫氏還家為書以

謝絕之

書云欲聞懸溜之響山鳥之鳴以為蕭韶九成不能勝也寓景青葱之下栖息巖岫之室

以為殿堂廣廈不能過也情聽孫為書答之書曰愚  
所終志絕於此吾具長別離矣  
下不才

侍執中擲榮華福祿相與共之如何君子駕其大義  
輕見斥逐若以此處遐曠非婦人所便昔梁生陟嶺  
孟光是携蕭史登臺秦女不舍衛人脩義夫妻同行  
老萊逃名伉儷俱逝豈非古人嘉遯之舉者許君乖  
離邁以永和三年入臨安西山改名玄字遠游後不  
知所終

晉穆帝皇后何準女居崑山南村一夕生后羣鳥驚鳴  
明日赦下又鳴今名其地烏夜村

後周宣帝四后朱氏小女蒲月吳人生靜帝後立為皇  
后班亞楊后靜帝立尊為帝太后隋初為尼改名法

卷五十七  
靜

顧琛母孔氏時年一百餘歲隆安初琅琊王廙於吳中  
為亂以為貞烈將軍悉以女人為官屬孔氏為司馬  
及孫恩亂東土饑荒人相食孔氏散家糧以賑邑里  
得活者衆生子皆以孔為名

互見  
琛傳

張稷長女名楚媛適會稽孔氏無子歸宗州人徐道角  
作亂害稷女以身蔽刃同遇害

張氏女子郡人張建第五女也三歲喪母靈牀上屏風

平生舊物屋漏沾濕出暴曬之女一見伏牀流涕家人怪其不起乃往抱持薦席淹漬精神傷沮不能飲食將以問醫醫診脉云腸斷矣因爾便吐血數日而亡

韓蘭英郡人有文辭宋孝武世獻中興賦被賞入宮明帝世用為宮中職僚齊武帝以為博士教六宮書學

以其年老多識呼為韓公事見齊武穆裴皇后傳

按隋

志梁有宋後宮司儀韓蘭英集四卷或云齊鬱林王時為內博士

范法恂妻褚氏勤苦執婦業昇明中孫曇瓘謀反亡命  
褚謂其子僧簡曰孫越州先姑之姉子與汝父親則  
從母兄弟交則義重古人逃竄脫不免汝宜收之曇  
瓘尋伏法褚氏令僧簡往斂葬之褚年七十餘永明  
中卒僧簡在都聞病馳歸未至而褚已卒將殯舉屍  
不起尋而僧簡至焉

吳仁璧女少能為詩父教以玄象陰陽之學仁璧自登  
第後生業甚薄嘗居越中佯狂求食一日女謂父曰

大人慎事出入恐懼憂毒天復初錢鏐命撰母墓銘  
仁璧不從被繫女泣曰文星失位大人其不免乎鏐  
命除水部員外郎遂沉之東小江驚濤中併女同害

時年十八

互見仁璧傳

朱億女郡人也淑行婉質工琴書至道初裴愈奉使兩  
浙聞其才藝奏之召至京師既入宮掖賜號白蓮花  
夫人後出俗刺血書蓮花經一部改賜慈濟廣惠大  
師億子光祿卿公綽之女二十娘子嫁朝請郎李防



亦聰慧作混元圖贈宜人

陳質妻長安縣君丁氏晉公謂之妹博士奇之母也謂  
欲官二甥丁固辭俾自學以德進謂疎然稱歎之奇  
兄弟繼登科鄉里稱為賢母胡瑗著丁氏賢惠錄蘇  
舜欽書之里人張紳世與陳舊其婦晚而沒丁祿其  
嬰歸付乳媪親加撫視能言而還之謂既南謫家日  
淪困有姪孫女幼孤丁訓養甚厚及歸馮氏子婦式  
嫻淑甚宜其家知州黃宗旦聞之謂之曰茲事可書

于史贈孝感郡太君

吳中李氏女能詩有詠破錢云半輪殘月掩塵埃依稀  
猶有開元字想得清光未破時買盡人間不平事

李處道妻龔氏宗元女也有文學讀書通大義賦詩書  
字皆過人晚年喜誦佛書自名曰守安處道年高而  
宦不達龔能安之卒年六十四

鄭絳妻錢氏廣陵王之玄孫也幼秀悟既歸絳姑御家  
嚴錢氏侍起居惟謹無故未嘗去左右姑疾嘗藥不

解衣者半年夫家素貧赴官不能具行裝適其娣自京師持金幣遺之甚厚錢氏不啓封謝而歸之退而曰身受娣賜固可抑何以全吾夫之廉乎

張弼妻徐觀妙直祕閣閔中女也建炎三年金兵犯揚州官軍奔潰肆掠執徐欲污之徐瞋目大罵曰朝廷畜汝輩以備緩急今敵犯行在既不能赴難反乘時為盜我恨一女子不能引劒斷汝頭以快衆忿寧肯受汝辱以苟活邪賊刺殺之投江中而去弼歷陽人也

何氏郡人吳永年妻建炎四年金兵陷平江城中人死者五十餘萬永年與其姊及何奉母逃匿母老須扶掖而行為兵所得將繫其姊及何何給之曰諸君何不武邪我婦人輩東西惟所命耳兵信之行次水濱何謂其夫曰我不負君自投于河其姊繼之陳長方作二烈婦傳

劉士英妻陳氏居父母家亦被擄獲赴井死士英字仲發武康人宣和二年為溫州教授方臘陷處州士英

設方畧率民守禦靖康初通判太原府金人圍城士  
英堅守不下接戰被執大罵不輟遂裂死年四十五  
官至通議郎旌其廟曰忠烈

祝磯妻徐氏郡人侍郎林之從姑

一云林之妹

通判壽之女

敏慧能詩孫覲以為不類婦人女子所為其筆墨畦  
逕多出於杜甫而清平冲淡蕭然出塵自成一家其  
賦尤工有閨秀集二卷傳於世雅山嘗侍夫人坐有  
言太素脉類妖妄者夫人徐曰醫和視晉侯之疾而

曰良臣將死天命不祐非太素脉乎其學識明辨類如此磯處州人也

狀元黃由夫人平江胡元功尚書之女善筆札時作詩文亦可觀至於琴碁寫竹等藝皆精自號惠齋居士沈清友郡中女子也能詩有云晚天移棹泊垂虹閒倚蓬窻問釣翁為甚鱸魚低價賣年來朝市怕秋風甚得風人之體又詠漁父云起家紅蓼岸傳世綠蓑衣詠牧童云自便牛背穩卻笑馬蹄忙下字之工如此

周氏太倉人贅張氏至正中父為百夫長謀刺其帥事泄夷其家父母及夫皆死次縛周于武陵橋將斬之帥之子惜其姿容令刃者舍之語曰能從我活汝命周怒曰豈有父母死而我獨生乎又曰苟從我當葬若父與夫屍周益怒曰我惟知死耳他無望也帥子拔佩刀磨其頸曰汝不從斷汝首啖汝肉周厲聲罵曰不義賊而父既殺吾父乃欲婦我邪顧所親曰我有白金可以買棺合葬我父母妾則附葬於夫帥子

度不可脅乃殺之

廣平路總管浦源子玉田妻梅氏郡人至正十六年淮  
兵破城梅氏匿旁小民家兵入夫逸去梅氏為兵所  
得見其色將污之梅氏探懷中金與之乘間赴水水  
淺不得溺兵至水次以刃擬梅氏梅氏不為動兵舍  
去後至者見婦面水上知其生復欲鉤出之力挽不  
肯升兵怒以戈搥其腋死高太史啓為傳

李富妻黃氏崇明人至正初海寇入境掠婦女登舟黃



氏義不受辱即投海死年二十七

后載妻失其氏載為郡吏至正丙申行役京口妻年三十姿色姝麗生一子一女城陷先屬子女於姻謂所親曰吾夫在遠而罹此大變或不幸被強辱雖欲死不可得矣寧捐吾軀以全吾心語未絕兵入妻赴水矣

趙淑儀吳縣趙夢炎女清獻公朴之裔孫也夢炎臥病時年七十餘家貧無醫藥資淑儀年十八乃焚香禱

于天刳股以進父患尋愈里社以上於府董章為守  
製孝女歌書綵障表于其門仍贈錢帛豚酒

茅氏宗明人嫁朱清之子虎清敗茅氏年三十二沒屬  
官醫師見逼連日茅氏晝夜號哭以死自誓卒不能  
奪虎故舊王大卿等鳩金贖為大都永安寺尼逾年  
以憂憤死至元中虎兄子謙以聞旌表墓門錄付史  
館

擔夫婦家郡城不知其姓名夫在公庾為擔夫張氏時

應募出充戰士丁未六月戰死于城西門婦號泣城下得其屍解衣拭之歛於棺哭盡哀既焚收骨裹以帛仰天大慟身與骨俱投於水

謝烈婦崑山沈度一妻也年二十八孀居將終焉至正壬辰方谷珍剽掠女婦甚衆謝度其姿容不可免自謀曰河去遠吾不能赴水以全屍苟得全吾志可矣因積薪縱火自焚

楊椿妻王氏椿死節王氏與子女二人皆不食一日卒

詳見椿傳

陳訓妻王氏節行見訓傳

七姬皆江浙行省左丞潘元紹妾紹戰將敗七姬

皆縊死

互見冢墓

薛氏者崑山銀工之女嫁縣小吏邵某洪武初邵坐法當死送京師婦時年二十餘蒙垢莫能掩其麗將行押卒見而悅之謂邵曰若欲生致都下盍使事我否則促死矣邵懼曰如命乃密呼婦語故婦曰吾身

潔汚君不得知君身不可復生矣佯應曰諾乃盛備  
酒饌飼邵至暮遂自縊於粉閣中隣里為葬之今冢  
在西湓瀆村彭氏菜園中即當時粉閣也事久湮沒  
天順末鄭進士文康得於表姑葉氏之言為作傳以  
表之

錢氏太倉人歸同里胡原洪武三十年原戍雲南遁  
竄事覺坐棄市錢謂之曰君萬里歸為妾耳今君死  
妾生何為至夜分抱乳兒泣曰吾不能保汝矣遂自

繼年二十八袁華為傳

張員外槩妻金氏名淑寧吳人德儒先生之女年二十二嫁槩洪武十九年槩得罪吏具辭將寘于法淑寧聞之曰吾雖歸張未及朞月義不可使夫獨死死于夫死之後孰若死于其前遂經死後三日槩得宥天台林右作張烈婦傳

史景忠妻鄒氏年十八嫁景忠而景忠謫戍大寧鄒與其姑及一女在行丙子歲寇發大寧城中有欲犯

鄒者鄒不從脅以刀鄒嚼齒罵延頸受刃竟被殺時  
年二十一

吳氏崑山吳澤女嫁縣吏沈濬濬病死子十歲吳謂  
之曰吾不復能撫兒矣及歛夫畢從容洗沐更衣自  
經年二十九歲

顧氏女太倉人父母早亡鞠於叔父初許嫁王氏未  
醮而夫亡叔父復許嫁徐氏擇日畢禮強之行不得  
已乃以帛纏束其體牢不可解至則謂徐曰吾非汝

家婦乃故王郎妻也堅拒不成禮徐亦義之不忍強至夕遂縊死

陳氏崑山小民陳演女嫁浦家奴黃福安未期而福安卒將殯陳携孤撫棺哭之哀甚至夜遂經死

鍾氏崑山陸安妻洪武中安父以事逮京師議大辟將磔市而安初婚乃謂鍾曰吾不忍吾父死吾將代刑汝其奈何安往竟死訃至鍾遂經

王素湖涇農家子也年十四嫁朱佩越四年而夫亡



父母憫其早寡無子潛以適人婦覺之乃縊

卓氏女字永潔長洲人適里人徐宣洪武壬午宣卒  
卓氏年二十一遺男女二人越二年二孤盡死卓氏  
操守益堅既而舅姑皆歿其母嘗疾篤巫醫皆不效  
卓氏割股作糜以進母食而愈後母死執喪盡禮人  
稱節孝之婦

吳天祥妻趙氏家貧奉姑甚孝天祥傭身於人趙每  
於三炊貯米一握積之以易醬肉為姑致滋味使姑

悅而不知家之窶也有兩兒姑酷愛之每食必呼之  
趙於食頃驅之出即闔戶姑問何在給云自留肉與  
不足念慮或云方出嬉戲人嘗見兩兒風雨蹲簷間  
問胡不歸兒云母奉婆婆羹恐分肉食我耳天祥長  
洲相城人

唐冕妻王氏其性孝姑病癰污穢不可近王手為除  
拭不怠嘗夜盜入室王倉猝擁病姑匿簷後時天大  
寒雨王以身蔽姑瀕凍死不舍吳文定公寬表其事

沈氏嘉定人年十九適顧隨產一女而寡親戚憐其貧潛許李氏李妻禽焉沈盛粧入室掩戶縊死

錢氏常熟陸茂妻嫁茂二年茂死葬歸即自縊年二十三歲

干得泉之女許贅徐景仁未婚而景仁以罪坐劓景仁之父以其子殘疾欲已婚得泉甚悅女不從曰彼初非殘者竟成婚事夫甚謹後數年景仁以前事例戍雲南其弟干祿謂曰若他適可免否則死萬里矣

干氏曰此何難遂自經死

陸氏子以吹笛為生其妻田家女也陸病久女歸父家求升粟還陸已死女哀哭祭畢遂自經于夫尸之傍

潘紹宗妾金增崑山人紹宗早卒金有貞操里人欲謀以其實聞表厥里居金聞而止之曰朝廷著令年二十九得聞三十不得聞也里人曰降一在我無難誰能知者金曰此非吾所安也遂寢其事

王妙鳳洞庭東山人嫁吳氏夫常商於外妙鳳獨與其姑居姑有淫行妙鳳恚憾而無如之何一日姑與所私飲命妙鳳溫酒妙鳳從爨室舉燎火警其人去其人入爨室戲牽其臂妙鳳憤極即拔刀斫臂父母來諭將理於官妙鳳曰死則死耳世豈有婦訟姑理邪死後里人白于縣縣梗於姑婦之議妙鳳之寃迄不獲申

狄阿先妻高氏嘉定人配狄一月狄患癰死高抱尸

慟哭三日家貧火葬火熾高氏躍入火中姑救出之  
高恨不得從夫死輒取夫骨齧吞之姑與父母驚怛  
而更昧其志相謂言疾嫁耳遲之則死矣漏言於高  
高歸舍即斷髮自誓其夕竟雉經

陸淑清長洲陽城人頗聰慧識字許村人楊紹淑清  
年二十二兩家赤貧不能嫁娶紹執役往京師惡少  
艷淑清容色謀妻之集黨撼其翁丈若不從我得無  
悔後禍邪翁丈愁諾淑清聞之號哭達曙惡少強委

禽焉淑清即自縊于房

鄒氏吳縣人嫁葉芸僅兩月芸卒鄒毀容誓死不出房限不見男子姑曰如火盜疾病何鄒曰火至委軀煨燼盜至則先自刎疾聽其死不得令醫診察年逾六十卒遺命就殯於室母受親戚男子弔夜半舉柩母令人見

俞氏吳縣學生顧春妻也春患病將革與俞訣勉其守節俞號泣不止因以指抉雙目不得出乃以剪刺

其左目血流遍體復欲刺其右姑奪其剪諭之曰爾  
欲養舅姑育二子留其一目可也俞乃止越六日春  
死

凡列女事行備載如右其國朝旌表節婦亦如孝  
友例附于後云

張成二妻唐氏洪武七年旌表

學士宋濂  
作旌門銘

姚榮二妻黃氏洪武七年旌表

編修蘇伯衡  
作旌門頌

陳已久妻孫氏洪武七年旌表



呂元哲妻錢氏洪武二十八年旌表

蔡仲彬妻夏氏洞庭山人永樂間旌表

濟南府經歷陳汝言妻吳氏永樂四年旌表

印仲彬妻周氏永樂四年旌表

戴君用妻吳氏宣德三年旌表

王友諒妻陳氏宣德十年旌表

杜德潤妻顧氏正統四年旌表

翰林檢討  
陳繼作傳

俞毓妻狄氏正統四年旌表

姚宗敏妻盛氏正統六年旌表

諸士賢妻祝氏正統六年旌表

其孫泰亦蚤卒妻張氏守節奉祖姑

郁信妻矯氏成化五年旌表

顏鑑妻吳氏成化十八年旌表

蘇倫妻陸氏成化十九年旌表

李芳妻傅氏弘治十一年旌表

夏衡妻吳氏弘治十一年旌表

衡崑山人

王昂妻唐氏弘治十二年旌表

進士顧竑妻杜氏弘治十三年旌表

已上  
吳縣

張新妻華氏張彥達妻胡斗奴俱洪武初旌表

樓紹妻王氏同為會稽人徙吳洪武二年旌表

紹元  
鄉貢

進士王氏卒後子澄請表母節朝命御史潛覈有以  
既死而難之御史移文有云若以死生有間則比于  
之墓誰封遂獲  
旌命宋濂作傳

張得妻顧三娘洪武三十一年旌表

陳彥良妻金氏永樂四年旌表

蕭山縣學訓導王永年妻陸氏永樂八年旌表

趙學遜妻徐氏宣德六年旌表

仰餘澤妻張氏正統三年旌表

革季謀妻張氏正統五年旌表

陳復妻鄒氏正統九年旌表

韓伯濟妻張氏正統十年旌表

周公美妻劉氏景泰三年旌表

陸塤妻浦氏天順二年旌表

陳頤妻華氏成化十二年旌表

王公著妻吳氏成化十二年旌表

魏公進妻尤氏成化十八年旌表

蕭貴妻吳氏成化十九年旌表

杜洪妻皇甫氏弘治二年旌表

已上長洲縣

劉彥敬妻阮妙瞻洪武十年旌表

查華二妻楊六娘洪武十九年旌表

范忠妻凌氏天順五年旌表

已上吳江縣

嚴華妻陶氏洪武七年旌表

范安妻凌氏洪武十六年旌表

水德妻李氏名惠洪武十年嘗以同籍兄事逮繫京  
有以勢脅欲娶李氏曰吾不以危難棄禮雖萬死無  
悔事聞護送還鄉至洪武三十年旌表

彭餘璋妻鄭氏字宜君生儒家歸再葺餘璋卒子方  
周晬抱持號哭成斂赴水死正統癸亥旌表

祝某妻錢氏航凍涇人天順間旌表

刑部主事盧瑛妻夏氏太常卿景之女成化五年旌

表

進士張經妻龔氏弘治間旌表

鄭友光妻朱氏弘治間旌表

已上崑山縣

陳剛妻錢氏洪武十六年旌表

季益妻李氏洪武十六年旌表

陳守恒妻陸氏正統三年旌表

吳本妻林氏正統五年旌表

吳克存妻陳氏監察御史淳之母也正統十二年旌

表

王永仁妻莊氏正統十四年旌表

朱亮妻陳氏天順四年旌表以子鉉仕監察御史封孺人

錢景豫妻徐氏天順八年旌表

錢宗時妻包氏成化元年旌表

蔡克溫妻凌氏成化五年旌表

徐元亮妻曹氏成化六年旌表



錢景暘妻鄒氏成化六年旌表

已上常熟縣

姑蘇志卷五十七